

Me Rom Yai Leta Paulo Wayahina

Buki Taina Wayahina

Buki taina a tau ginuma vivane Paulo. Tutana buki taina ginumi, tauna mamaei meagai Korinita nihenina, ka ya nuanua munia meagai Rom na-nau-vi-tau. Wayahina, naona tauna tau ekalesia Rom wayahina yai leta taina ginumi, e ya viwavenena habuhabuna vo-vi-mahetei in'-anamanei.

Buki Mateu, ka Marika, ka Luke, ka kadu Ioni na nau-punina Iesu yana dewa tanopia inau-viviwaveka. Ka buki Dewa tau hae anani yai dewa ekalesia vovouna wayahi nau-viviwaveka. Kate Paulo avaha anamanei tomotau habuhabui eha ita-nua-hau ahiahina dewaia habuhabui ai anamana wayahi. Tau ekalesia-naia ianamanei vivane Iesu aniga yai dewa goyona wayahi, kate eha it'-anamane ahiahina medeina yawai vidoha dewaia wayahi. Ka kadu yai vi-tanai habuhabui imamaei. Dewa goyona aviani? Medeina dewa goyona avihahaiei? Aituhu dewa goyona adewei, medeina avidoha?

Wayahina, leta taina nihenina Paulo vi-tanai-naia habuhabui vona-nau-patei, kadu dewa habuhabui vo-vi-mahetei kan'-anamanei. Tomotau sinasinapui ivonevoneka, vo-vi-maheta buki taina nihenina vo-vi-maheta mani buki habuhabui nihenia vane-tawanei.

Pai vi-putu wayahina ka pai nau-yehata wayahina vitumahana vivane pai mini ananina buki taina nihenina. Mosese ya veimea eha ana pata na-ito-yavuhika. Ka mani veimea o kadi mani dewa tomotau wayahia eha ai pata ina-ito-yavuhika. Ana heta vitumahana Iesu wayahina ana pata na-ito-yavuhika.

Pai Vi-putu

¹ Yaiau, yami leta taina aginumi omomo wayahimia. Yauke Paulo, Tau Ito-yavuha Iesu ya tau paisewa aitam. Ka Yaubada vi-nua-dadaneu, e honeu, kadue bou-keyeu avi-tau hae ananiu tauna Vaneana Ahiahina wayahina.✧
² Nonova Yaubada tauna ya vona-dabadaba boui wayahika, e tauna ya tau apa-taputapu mataedai. Ka tau vona-dabadaba-nana iginumi Iginuma Ahihinata tutuaina nihenina.✧ ³ Ka vona-dabadaba-nana vivane Vaneana Ahiahina tauna Natu-hoina wayahina. Tauna onoto kadu tauna Yaubada. Tauna Davida yana dede wayahina tupua ininina, ⁴ ka kadu Yaubada Nuana avaha awaehei tauna vivane Yaubada Natu-hoina, ka kadu Iesu Tau Ito-yavuha ya mini-havine wayahina Nuana viwaveneka deina, ka dewana dewa-bagibagina. Ika, Iesu Tau Ito-yavuha, tauna yaka Kauvea. ⁵ Ka tauna am-venena awawaehina veneu avidoha Yaubada matana deina, ka kadu tauna awaeheu avi-tau hae ananiu aitam. Ka yauke yau paisewa taina. Tau eha me Iudea habuhabui ahonehinei Yaubada yana vona ivitumahanei.

✧ **1:1:** Dew 9:15. ✧ **1:2:** Rom 16:25-26.

Ka tupwai wayahia ivitumahanei, e ivi-putu yana vona ivi-ateteyei. ✧ ⁶ Ka itomi tupwai deina. Yaubada avaha honemi Iesu Tau Ito-yavuha uvitumahanei, uvi-ateteyei. Ka vona ahiahina, itomi vivane Iesu ya ekalesia nihenina umamaei.

Paulo Ya Nau-kaiwa Me Rom Wayahia

⁷ Wayahina, itomi habuhabumi meagai Rom wayahina umamaei anau-kaiwa wayahimia. Yaubada Amaka dune-nuanuaiemi, ka tauna avaha honemi kadu bou-keyemi uvi-tau ekalesia.

Ka yau nuanua wayahimi am-venena awawaehina kadu nua gomagomanina uvaniahei Yaubada Amaka wayahina kadu Kauvea Iesu Tau Ito-yavuha wayahina. ✧

Paulo Ya Viama Me Rom Wayahi

⁸ Iesu Tau Ito-yavuha yana dewa wayahina etawana vevewanei wayahika Yaubada kana-nau-kaiwei. Wayahina, naona yau Yaubada anau-kaiwei itomi habuhabumi wayahimi. Iuna tanopi taina habuhabuna wayahina tomotau itomi yami vitumahana ihaehaeyei. ⁹ Yauke yau Yaubada wayahina apaipaisewa au ayaunena habuhabuna wayahina kadu yau nuanua habuhabuna wayahina. Ka yau paisewa vivane tomotau wayahia Yaubada Natu-hoina Vaneana Ahiahina anau-waheyei. Ka vona ahiahina, Yaubada avaha anamaneu tuta tuta taumi anuanimi yauke ¹⁰ yau viama nihenia. Ka ataina tuta ahidahida aituhu Yaubada ya nuanua ka aituhu tauna na-ivaiteu, akanai memeanina

✧ **1:5:** Dew 26:16-18; Gal 2:7-9. ✧ **1:7:** Yau 6:25-26.

an'-omo wayahimia, anau-vi-taumi. Iuna nonova yau nuanua anau-vi-taumi deina, kate eha au pata.☆

¹¹ Ataina yau nuanua ananina apaina anau-vi-taumi, ka yau nuanua am-venena awawaehina nuaka wayahi avo-patami, e nuami nihenia avo-vi-vatumi deina. ¹² Ika, yau vitumahana wayahina taumi avo-vi-vatumi, kadu yami vitumahana wayahina taua uvo-vi-vatu tuta aitamoata wayahina deina.

¹³ Ka vavaneiu, yau nuanua un'-anamanei tuta habuhabui wayahia avi-nua-hauhau an'-omo wayahimia anau-vi-taumi, kate tuta tuta dewa tunina tunina ibou-potapotau. Wayahina, nonova a itoava tuta ataina wayahina eha memeanina wayahiua an'-omo wayahimia. Yau nuanua ananina yau nau-wahe wayahina ana-ivaitemi. Mani tomotau eha me Iudea mani papani nihenia avaha aivaitei deina. Ka ataina avaha tuta ahiahina avaniahei, e nau-wawaniu anau-vi-taumi.☆

¹⁴ Au veimea aitam mamaei, ka veimeana yau paisewa habuhabuna veimeyei vivane nau-wawaniu tuta tuta tomotau habuhabui aivaitei, tau me Girisi ka kadu tau eha me Girisi, ka tau sinasinapui ka kadu tau mwagemwagei deina. Nau-wawaniu habuhabui aivaitei.

¹⁵ Wayahina, yau nuanua ananina kadu itomi me Rom Vaneana Ahiahina anaunau-wahemi.

Vaneana Ahiahina Bagibagina

¹⁶ Yauke eha aini-yauyau Vaneana Ahiahina wayahina, kate avaha avitumahanei Vaneana

☆ **1:10:** Dew 19:21; Rom 15:23. ☆ **1:13:** Dew 19:21.

Ahiahina vona tunutunuhina. Ka Yaubada bag-ibagina, ka aituhu aviyaiuia Vaneana Ahiahina ivitumahanei, akanai tauna na-ito-yavuhi-neiei. Vaneana Ahiahina me Iudea na-ivaitei ivitumahanei, ka kadu me Girisi na-ivaitei ivitumahanei aitamoata deina.✧ ¹⁷ Iuna Vaneana Ahiahina vi-waveneka medeina nua gomagomanina kavania-hei Yaubada yana dewa tunutunuhina wayahina. Nua gomagomanina a pai vi-putu vivane yaka vitumahana, ka kadu a pai nau-yehata vivane yaka vitumahana. Ka Iginuma voneka deina, ivona,

“Aituhu aviyaiuia yai nuanua
yawai vivane tunutunuhi Yaubada matana,
akanai tau nau-wawani
Yaubada ivitumahanei.”✧

Tomotau Yai Dewa Goyona Yaubada Matana

¹⁸ Yaubada avaha nua-goyo tomotau yai dewa goyona habuhabui wayahi. Ka tauna tomotau ai dewa-yaiyai si-vin'-omanei kadueyei. Tau yana vona tunutunuhina ibou-potei yai dewa goyona wayahia. ¹⁹ Ka Yaubada ana heta avaha ya etawana ahiahina si-vin'-omanei, ka kadu tau avaha ianamane-yehai, iuna tauna avaha ya nuanua vo-vi-mahetei. Kate tau ivihahaiei.✧ ²⁰ Tuta naona wayahina, tutana Yaubada tanopi vevewanei, a itoava tuta ataina wayahina, tomotau ai pata in'-anamanei ahiahina tauna vivane Yaubada-hoina. Ka kadu tau ai pata in'-anamanei tauna ya bagibagi eha

✧ **1:16:** Mar 8:38; 1Ko 1:18-24; Dew 13:46. ✧ **1:17:** Rom 3:21-22; Aba 2:4. ✧ **1:19:** Dew 14:15-17; 17:24-28.

na-iakwa. Vona ahiahina, itoka tomotau eha aka pata Yaubada ya bagibagi ma'-vavaha matakaia kadudueye, ka eha aka pata tauna yawaina ahihinata matakaia kadudueye. Kate itoka tomotau aka pata dewaia ima'-vavaha kan'-anamanei. Iuna Yaubada tauna ya vevewana habuhabui vevewanei, ka aka pata vevewanaia kadudueyei matakaia. Ka aituhu aviyavia Yaubada ivihahaiei, eha aitam vona-yavuha mamae tau wayahi. Iuna vevewanaia habuhabui tomotau yai vihaihai iaipupu-tana-potepotei.✧

²¹ Tau avaha Yaubada ya vevewana idudueyei, kadu avaha ianamanei tauna mamaei, kate eha Yaubada it'-awa-dave, ka kadu eha ita-nau-kaiwe. Tau inua-vane, ka kadu nuai awakabina. Wayahina, Yaubada nuai vo-vi-novanovani.✧ ²² Tau ivona-vanevane yai nua-uya ananina wayahina, kate vona ahiahina, tau ivi-kwavakwava,✧ ²³ ka Yaubada Ma'-vavaha didigana ivihahaiei, e ivi-putu itupwana wayahia iaiwaodu. Tau ai-tai nimaia itupwana inau-vevewanei, ka tupwai wayahia ai dune tomotau deina, ka apaina tomotau habuhabuka kan'-aniga. Ka tupwai wayahia ai dune manua iyaveyaveha deina, ka tupwai wayahia ai dune vahitau deina o mwata ivi-dobwa-niuniu neine deina.✧

²⁴ Wayahina, Yaubada tau yai nua-hivahiva goyona eha ta-bou-pote, kate avi tuta tau yai nuanua ikenene ani-vainena, akanai Yaubada eha ta-bou-pote. Wayahina, tau

✧ **1:20:** Iob 12:7-9; Sam 19:1. ✧ **1:21:** Epe 4:17-18. ✧ **1:22:** Ier 10:14; 1Ko 1:20. ✧ **1:23:** VV 4:15-19; Sam 106:20.

inini ivo-vi-gawagawami aitamoata aitamoata wayahia. ²⁵ Iuna tau i yai nuanua ikenekenene deina. Wayahina, tau i Yaubada yana vona tunutunuhina ivihahaiei, ka vitupu ivitumahanei. Tau i ivi-putu Yaubada ya vevewana wayahina iaiwaodu deina, kate eha Yaubada ana heta wayahina ita-iwaodu. Tauna ana pata yai dewaia bou-potei, kate eha ya nuanua na-bou-pote. Ka vona ahiahina, Yaubada wayahina nau-iaiva habuhabui ima¹-vavaha. Ana pata deina.

²⁶ Yaubada tau i yai dewa goyona awaehei vivane yai nua-hivahiva goyona tau i yawai veimeyei. Tauna ana pata yai dewaia goyona na-bou-potei, kate eha ta-bou-pote. Wayahina, vaivine yai dewa nau-wawani ononotoi wayahia idedewe, dewaia ini-tawanei, e mani dewa idedewei. ²⁷ Ka ononotoi kadu deina, avi dewa nau-wawani vaivine wayahia idedewe, dewai ini-tawanei, ka tau i ai heta-ohota yai nua-hivahiva nau-vi-yabeni ana heta ana heta wayahina, onoto ka onoto ivo-dadani idewa-goyogoyo, kadu idewa-bwagobwago deina. Ka yai dewa goyo-vaine-nana a dewa-yaiyai mamaei, ka inini nihenia dewa-yaiyai-nana ivaniahei.✧

²⁸ Ka kadu tau i yai nua-uya viam-nonona wayahina Yaubada ivihahaiei. Wayahina, Yaubada nuai nau-vi-nehenehei, kadu awaehei dewa goyona tunina tunina idewa-nubunubui. ²⁹ Wayahina, ataina dewa goyona habuhabui avaha yawai inau-vi-anai, ka gugua a nua-tania,

✧ **1:27:** Lev 18:22; 20:13; 1Ko 6:9.

ka kadu nua-goyo. Tau i imabonu, ³⁰ ka kadu mani tomotau iapa-goyogoyoei, ka kadu Yaubada inau-nikonikoiei. Tuta tuta tau ivonavona ikoi, ka inua-vane, kadu ivona-vanevane. Ka kadu tau dewa goyona vovouna inau-vevewanei. Ka tau ayoyoi ka amamai yai veimea ivihahaiei. ³¹ Tau eha ai pata in'-ayaune tunuhina. Ka eha ivitumahane tunuhina, ka eha iate-nuanuai, kadu eha idune-nuanuai. ³² Tau avaha ianamanei aituhu aviyaivia dewaia idedewei, akanai tau nau-wawani ai dewa-yaiyai vivane aniga. Iuna Yaubada avaha ya vi-nua-dadana tunutunuhina boui deina. Kate tau eha imatamatauta dewa-yaiyai-nana wayahina. Tau idedewei deina, kadu aituhu aviyaivia dewa goyo-vaine-naia idewa-nubunubui, tau tomotau iapa-vidovidohei.

2

Yaubada Ya Vi-nua-dadana Wayahika Tunutunuhina

¹ Aituhu aviyaivia dewa goyona idedewei, kadu aituhu tau vavanei iapa-goyogoyoei, eha aitam vona-yavuha mamae tau wayahi. Tau kadu yai dewa iapa-goyogoyoei deina, iuna tau yai dewa ka vavanei yai dewa vivane aitamoata. ² Yaubada avaha voneka, aituhu aviyaivia dewa goyonaia idedewei, akanai tau nau-wawani dewa-yaiyai ivaniahei. Kadu avaha kanamanei Yaubada ya vonana tunutunuhina. ³ Itomi eha Yaubada. Itomi vivane tomotau. Wayahina, aituhu itomi yami dewa goyona,

☆ **2:1:** Mat 7:1-2; Ioni 8:7.

kadu aituhu itomi vavaneimi unau-yanahi, eha nau-wawanimi unuanua vivane ami dewa-yaiyai Yaubada wayahina una-novo-tawane. Eha ami pata. Apaina uvaniahei akanai. ⁴Yaubada yana dewa bigana wayahikaia ani-vainena, ka tauna nua-piahika, ka kadu tauna yaka nua-vinana wayahina potapotaka. Avaha uanamanei, o eha? Aituhu itomi eha unua-vinana, vona ahiahina, Yaubada ya dewaia ahiahina wayahika umana-giboei deina. Ka kana-vona itomi mwagemwagemi. Iuna Yaubada ya dewaia ahiahina tainimi kadu eta-naoemi unua-vinana.✧

⁵Ataina nuami toyoina, ka kadu itomi yami nuanua eha unua-vinana. Wayahina, ataina itomi dewa-yaiyai ananina utotohi potapotami. Apaina Yaubada ya nua-goyo dewa goyona wayahina kadueyei, ka auyewana wayahina ami dewa-yaiyai itomi yami dewa goyona wayahina uvaniahei akanai. Ka Yaubada ya nau-yanahina vivane tunutunuhina. ⁶Ka Yaubada

“tomotau aitamoata aitamoata
ai nau-pata vene-neiei,
taui yai dewa aitamoata deina.”✧

⁷Aituhu aviyaivia yai nuanua apaina Yaubada tauna ya bagibagi vo-patai, ka aituhu aviyaivia yai nuanua apaina Yaubada awa-vidovidohei, ka kadu aituhu aviyaivia yai nuanua apaina Yaubada yawai-vavaha venei, akanai tomotau dewa ahiahina idewa-nubunubui tuta ataina a itoava auyewa pai nau-yehata wayahina. Ka

✧ **2:4:** Epe 1:7; 2Pi 3:15. ✧ **2:6:** Sam 62:12; VT 24:12; Mat 16:27; 2Ko 5:10.

munia, tau i yawai-vavaha ivaniahe i Yaubada matana. ⁸ Kate aituhu aviyaivia ai heta inu-anua, ka aituhu aviyaivia vona tunutunuhina ivihahaiei ka dewa goyona ivi-munie, akanai apaina tau dewa-yaiyai kadu nua-goyo ivaniahe i Yaubada matana. ⁹ Iuna aituhu aviyaivia dewa goyona idedewei, tau inahe kadu nua-vita ivaniahe i. Ika, tau me Iudea ivaniahe i deina, kadu tau eha me Iudea ivaniahe i aitamoata deina. ¹⁰ Kate aituhu aviyaivia dewa ahiahina idedewei, tau bagibagi ivaniahe i, ka awa-vidovidoha ivaniahe i, ka kadu nua gomagomanina ivaniahe i. Ika, tau me Iudea ivaniahe i deina, kadu tau eha me Iudea ivaniahe i aitamoata deina. ¹¹ Iuna Yaubada ya veimea eha ainua, ka ya nuanua eha ainua. Yaubada ya veimea vivane aitamoata itoka tomotau habuhabuka wayahika, ka kadu ya nuanua aitamoata tomotau habuhabuka wayahika. Ka tauna eha ya nuanua ta-vo-vinevine.

¹² Aituhu aviyaivia avaha Yaubada ya veimea ianamanei, ka aituhu tau dewa goyona idedewei, akanai munia, avi tuta in'-aniga, akanai Yaubada tau yai dewa aitamoata aitamoata nau-yanahi tauna ya veimea wayahina, ka tau ai dewa-yaiyai ivaniahe i. Ka kadu aituhu aviyaivia eha Yaubada ya veimea it'-anamane, ka aituhu tau dewa goyona idedewei, munia tau ai dewa-yaiyai yai dewa goyona wayahi ivaniahe i aitamoata deina. ¹³ Iuna aituhu aviyaivia Yaubada ya veimea inononi, ianamanei, kate aituhu eha ita-dedewe, tau yai anamana eha aitam aviani Yaubada matana. Kate, aituhu

☆ 2:8: 2Te 1:8.

aviyaivia Yaubada ya veimea ivi-ateteyei, apaina Yaubada vonei, “Itomi tunutunuhimi.”
 14-15 (Ika! Tau i eha me Iudea eha Yaubada ya veimea it'-anamane, kate tupwai tuta tau i yai dewa aitamoata Yaubada ya nuanua wayahi deina. Wayahina, kana-vona Yaubada ya veimea mamaei tau i nuai nihenina, ka tau i yai dewa viwaveneka vivane tau i Yaubada ivi-ateteyei deina. Ka kadu tau i ai ayaunena haehaeyei deina. Iuna aituhu dewa goyona idedewei, akanai ai ayaunena tau i mana-giboei. O aituhu dewa ahiahina idedewei, akanai ai ayaunena tau i apa-vidovidohei.)[☆] 16 Ka apaina aitam auyewa omomo, ka auyewana wayahina Yaubada tomotau yai nua-hivahiva si-vin'-omane i ka na-nau-yanahi, ka tau i nua-hivahiva-naia ai nau-pata ivaniahei. Ka Yaubada awaehei Iesu Tau Ito-yavuha ai dewa-yaiyai vi-nua-dadani, venei deina. Ka Vaneana Ahiahina anaunau-waheyei awaehei apaina dewaia iomomo.

Me Isiraeli Ka Yaubada Ya Veimea

17 Yau ipupu taina itomi me Iudea wayahimi. Itomi me Iudea aitamoata aitamoata unuanua kadu uvonavona deina,

“Yauke Yaubada ya veimea anamane-yehai, kadu Yaubada apa-vidovidohe iuna veimeana wayahiua mamaei. 18 Wayahina, yauke avaha Yaubada ya nuanua anamane i, ka kadu au pata dewa ahiahina ka dewa goyona ainua atana-vewani, iuna veimeana viwavenue deina. 19 Ka kadu avitumahaneu yauke

[☆] 2:14-15: Dew 10:35.

au pata tau mata-goyogoyo aeta-naonaoei, ka yauke aitam maheta tau novanovana nihenina wayahi. ²⁰ Ka kadu yauke aitam tau viwavenena tau mwagemwagei wayahi, kadu tau meameai wayahi. Iuna Yaubada ya veimea wayahiua mamaei.”☆

²¹ Itomi me Iudea aitamoata aitamoata unononi. Yauke yau vi-tanai aitamoata aitamoata wayahimia taina. Itomi yami dewa medeina? Itomi mani tomotau uviwaveneni akanai, kate itomi yawaimi medeina? Kaiwadi, taumi uviwavenemi, o eha? Itomi mani tomotau unaunau-wahei tau eha nau-wawani ivainau, kate itomi medeina? Kaiwadi, itomi tau vainau?☆ ²² Ka kadu itomi mani tomotau unaunau-wahei tau eha nau-wawani yaiai awawai nui ikenekenene. Kate itomi medeina? Kaiwadi, itomi tau kenekenene? Ka kadu itomi itupwana unau-nikonikoiei, kate yami dewa medeina? Kaiwadi, itupwana ai manua tapanono a gugua uvainau? ²³ Ka kadu itomi uvona-vanevane, iuna itomi Yaubada ya veimea uanamanei, kate medeina? Aituhu itomi Yaubada ya veimea utana-bwegebwegei, vona ahiahina, tauna uapa-goyogoyoei yami dewa wayahina. ²⁴ Tau apa-taputapu avaha Iginuma nihenina ginumi deina,

“Tau eha me Iudea Yaubada ana wava iapa-goyogoyoei.
Iuna itomi me Iudea yami dewa eha tunuhina.”☆

☆ **2:20:** 2Ti 3:5. ☆ **2:21:** Mat 23:3-4. ☆ **2:24:** Isa 52:5.

²⁵ Itoka me Iudea yaka dewa tutuaina taina deina. Itoka onotoka ininika kadabei, iuna aidaba-nana viwaveneka itoka vivane Yaubada yana yoko. Ka aituhu itomi Yaubada ya veimea habuhabuna udedewei, akanai aidaba-nana ahi-ahina wayahim. Kate aituhu itomi Yaubada ya veimea utana-bwegebwegei, akanai itomi tau i eha me Iudea deina, ka yami aidaba eha aitam aviani ta-viwaveneka. ²⁶ Wayahina, aituhu aviyaivia eha yai aidaba, kate aituhu tau i Yaubada ya nuanua ya veimea nihenina idedewei, akanai Yaubada awaehi tau i yana yoko.✧ ²⁷ Ka ataina itomi me Iudea yami aidaba mamaei, ka kadu Yaubada ya veimea wayahimia mamaei, kate tupwami veimeana utana-bwegebwegei. Ka mani tomotau eha yai aidaba, kate tau i Yaubada ya veimea ivi-ateteyei. Ka apaina, avi tuta Yaubada tomotau yai dewa ai nau-pata vi-nua-dadani, tau i eha yai aidaba ivi-wavenemi itomi yami dewa eha tunutunuhina. Iuna tau i ai nau-pata ahiahina ivaniahei, kate itomi ami nau-pata goyona uvaniahei.

²⁸ Vona ahiahina, me Iudea-hoina eha tauna yan' aidaba ininina ana heta mamaei. Iuna dewa-dabadaba-hoina eha ininika nihenina. ²⁹ Eha. Aituhu aitam onoto avaha nuana dabadabana, akanai tauna vivane me Iudea-hoina. Iuna dewa-dabadaba-hoina nuaka nihenina. Yaubada ya veimea eha ana pata na-dabaka deina, kate Yaubada nuaka dabei Nuana Ahihinata wayahina. Ka aituhu aviyaivia yai aidaba nuai nihenina mamaei, apaina tau i ai awa-dava ivaniahei Yaubada wayahina, eha

✧ 2:26: Gal 5:6.

tomotau ai heta wayahia.✧

3

¹ Vonaia vona ahiahina. Wayahina, yau vi-tanai taina habuhabumi wayahimia mamaei. Tau me Iudea tau eha me Iudea ivane-tawanei, o eha?

² Avonemi ika! Dewa tunina tunina wayahina me Iudea tau eha me Iudea ivane-tawanei. Naona, Yaubada me Iudea tauna yana ipupu kadu tauna ya vona-dabadaba venei, idune-vi-avini. ³ Vona ahiahina, me Iudea tupwai eha yana ipupu ita-vitumahane ahiahina. Ka tau tau goyogoyoi, kate Yaubada eha goyona deina. Tauna eha ya vona-dabadaba ta-vi-nua-pani, kate tauna nuani, kadu dedewei. ⁴ Aituhu tomotau aitamoata aita-moata tau vitupu, dewana eha ana pata Yaubada na-vo-vine. Tauna tunutunuhina ma'-vavaha, Iginuma ivona deina,

“Vona ahiahina, apaina tomotau idueyei
yam vi-nua-dadana tunutunuhina,
ka kadu avi tuta tomotau inau-vonuvonu
yam vi-nua-dadana wayahina,
apaina tau kadu in'-anamanei
yam dewa tunutunuhina.”✧

⁵ Vonana vona ahiahina akanai. Ka apaina aitam tomotau mwagemwagena na-vona deina, “Aituhu yauke yau dewa goyona ka Yaubada yana dewa ahiahina ainua kabou-viwavei, memeanina kadueyei Yaubada ahihi-vainena. Wayahina, yau dewa goyona Yaubada an' anamana ahiahina

✧ 2:29: VV 30:6; Kol 2:11. ✧ 3:4: Sam 51:4.

ivaitei deina. Ka aituhu Yaubada dewa-yaiyaieu yau dewa goyona wayahina, tauna ya dewana eha tunutunuhina deina.”

(Aviyaivia eha Yaubada it'-anamane ahiahina, akanai tau ai pata ina-ipupu deina.) ⁶ Kate ipupuna eha ipupu ahiahina. Iuna apaina Yaubada tomotau habuhabuka na-nau-yanahika. Ka tauna paisewana ana pata, iuna yana dewa habuhabuna tunutunuhina ana noe.

⁷ Ka kadu aitam onoto mwagemwagena yana ipupu deina, “Aituhu tomotau yau vitupu inononi, ka aituhu yau vitupu Yaubada yana vona ainua ibou-viwavei, akaka dewana wayahina memeanina wayahia idudueyei Yaubada yana vona vivane tunutunuhina. Wayahina, aituhu Yaubada didigana avo-vi-natei deina, medeina Yaubada ivona vivane yauke tauna a havia?”

⁸ Yaiau, tau vitupu tupwai imana-giboeu ka ivonavona vivane yauke, Paulo, aipuiipupu deina. Tau ivonavona, “Paulo vonavona, ‘Yaiau, nau-wawanika dewa goyona kadewa-nubunubui, e apaina dewa ahiahina vin'-omo yaka dewa goyona wayahina akanai.’ ”

Ia! Vonana vitupu ananina. Apaina Yaubada tomotau na-dewa-yaiyaiei, kadu dewa-yaiyaina ivaniahei yai ipupuna wayahina akanai.

Eha Aitam Tomotau Yana Dewa Tunutunuhina

⁹ Wayahina, yau vonana an' anamana medeina? Kaiwadi, itoka me Iudea yawaika tau eha me Iudea yawai ivane-tawanei, o eha? Yaiau, avonemi eha! Iuna goyona itoka tomotau habuhabuka bagibagi-tawaneka, kadu goyona

veimeyeka kavi-ateteyei, tauka me Iudea kadu
tau eha me Iudea.✠ 10 Kadu Iginuma ivona deina,

“Eha aitam tomotau yana dewa
tunutunuhina Yaubada matana,✠

11 ka kadu eha aitam tomotau ta-nua-hau,
ka kadu eha aitam tomotau Yaubada
ta-nenene.

12 Tomotau habuhabui avaha Yaubada
ini-tawanei,
ka habuhabui etawana goyona
ivi-nua-dadani,

ka eha aitam wayahia yana dewa ahiahina,
eha aitam.”

13 “Tau eha ipupu deina, ka vona vitupu meaia
vin'-omo-nananena,”

“kadu vona honahonana epunaia
vin'-omo-nananena,
mwata yai pohavu deina,”✠

14 “Bwanata manimaninina awai nau-vi-anai.”✠

15 “Tau eha ivo-kwayavoni tomotau
ivunui inau-vi-anigi.”✠

16 Kadu aveta baina ineine, akanai vita-vovona
kadu inahe natanata mani tomotau wayahia.

17 Tau eha nua gomagomanina a etawana
eha it'-anamane,

kate vi-naua ana heta a etawana
ianamanei,”

18 “kadu tau eha Yaubada imata-
mataute.”✠

✠ 3:9: Rom 1:18–2:24; 3:23. ✠ 3:10: Sam 14:1-3; 53:1-3.

✠ 3:13: Sam 5:9; 140:3. ✠ 3:14: Sam 10:7. ✠ 3:15: Isa
59:7-8. ✠ 3:18: Sam 36:1.

¹⁹ Wayahina, Yaubada ya nuanua kadueyei! Tauna ya veimea veneka, iuna veimeana yaka goyona viwaveneka. Ka avaha yaka goyona kanamanei, eha aka pata kan'-awa-vidovidoheka tauna matana. Ka kadu eha aka pata kanau-vonuvonu tauna ya vi-nua-dadana wayahina. Ka kadu eha aka pata kanovo-tawane. Iuna tau ma' tanopi habuhabuka nau-wawanika yaka dewa ai nau-pata kavaniahehi Yaubada wayahina. Wayahina, Yaubada ya veimea a pai mini ananina taina, vivane itoka aitamoata aitamoata kagenuana tauna matana.

²⁰ Wayahina, eha aitam tomotau ana pata na-ipupu, na-vona, "Yaubada ya veimea awahehu yauke yau dewa tunutunuhina." Eha. Yaubada ya veimea yaka dewa goyona si-vin'-omanei viwaveneka.✧

Yaubada Ya Etawana Yaka Vidoha Wayahina Tunina

²¹ Yaubada ya nuanua ananina kavi-tau tunutunuhika tauna matana. Wayahina, tauna etawana nau-seanina vevewanei yaka vidoha wayahina. Ataina Yaubada etawanana viwaveneka, kadueyei. Udu! Etawanana eha tauna ya veimea. Yaubada ya tau apa-taputapu habuhabui etawanana iapa-taputapuei Iginuma nihenina. ²² Ka etawanana nau-seanina taina. Aituhu Iesu Tau Ito-yavuha kavitumahanei ahiahina, akanai Yaubada dewa-vidovidoheka tauna matana. Aituhu aviyaivia me Iudea, o aituhu aviyaivia eha me Iudea, akanai tomotau

✧ **3:20:** Sam 143:2; Rom 7:7; Gal 2:16.

yai tupua eha aitam aviani yaka vidoha wayahina Yaubada matana. Aituhu Iesu kavitumahanei ahiahina, Yaubada itoka tomotau aitamoata aitamoata bou-vidovidoheka.✧ ²³ Aitamoata aitamoata wayahikaia dewa goyona kadedewei. Wayahina, aitamoata aitamoata wayahikaia kavi-kutakuta Yaubada didigana wayahina. ²⁴ Kate udu! Aka pata kavidoha Yaubada matana yan' am-venena awawaehina wayahina. Nonova goyona yawaika poy'-avini ka veimeyeka. Ka Yaubada dewa-vidovidoheka yaka Tau Ito-yavuha Iesu wayahina, iuna Iesu yaka goyona epa-yavunei. Wayahina ito-yavuha kavanaiahei tauna ya dewana wayahina.✧

²⁵⁻²⁶ Nonova Yaubada tauna ya veimea nihenina voneka itoka tomotau yaka goyona a nau-pata tunuhina vivane kan'-aniga. Nonova tauna eha goyo-naia wayahi ta-dewa-yaiyaieka, kate tauna potapota nau-pata tunuhina dewaia wayahina. Ataina kadueyei Yaubada Iesu vi-nomui, ka Iesu yan' aniga vivane nau-patana tunuhina. Wayahina, tuta ataina aituhu Iesu kavitumahanei, akanai Yaubada nua-piahika. Ka Yaubada ya dewana kadueyei vivane tunutunuhina. Tauna yaka goyona nau-pateyei, kadu etawana nau-seanina vevewanei yaka vidoha tauna matana wayahina. Kadu aituhu aviyaivia ivitumahanei Iesu vivane yaka Tau Ito-yavuha, akanai Yaubada tau na-nua-piahi-neiei.

²⁷⁻²⁸ Wayahina, itomi me Iudea anau-dadanemi vi-tanai tupwai wayahia. Itoka me Iudea

✧ 3:22: Gal 2:16. ✧ 3:24: Rom 5:1.

medeina? Aka pata kavona-vanevane Yaubada matana yaka dewa wayahina? Tauna ya veimea veneka, ka dewana wayahina aka pata kavona-vanevane? Avonemi eha! Eha aka pata kavona-vanevane, iuna yaka vidoha Yaubada matana eha ta-vin'-omo yaka dewa wayahika, kadu yaka vidoha eha ta-vin'-omo veimeana wayahina. Vona ahiahina, yaka vidoha Yaubada matana vin'-omo tauna yana dewa wayahina, ka itoka dewana kavitumahane-ohoi. Aituhu aka pata Yaubada ya veimea aitamoata aitam kadedewe, akanai kavona-vanevane yaka dewa wayahina. Kate eha aka pata. Wayahina, etawana aitamoata ana heta mamaei yaka vidoha Yaubada matana wayahina, vivane Iesu kavitumahanei.

²⁹ Ka itomi me Iudea anau-dadanemi kadu aitam vi-tanai wayahina. Yaubada medeina? Tauna itoka me Iudea aka heta yaka Yaubada, o kadi tauna kadu tau i eha me Iudea yai Yaubada? Vona ahiahina, tauna itoka yaka Yaubada kadu tauna tau i yai Yaubada, eha itoka me Iudea aka heta yaka Yaubada.✧ ³⁰ Yaubada vivane aitamoata, ka tauna ya etawana itoka tomotau yaka vidoha wayahina vivane aitamoata. Aituhu aviyaivia me Iudea wayahikaia Iesu kavitumahanei, akanai Yaubada yaka goyona nua-piahi, e kavidoha tauna matana. Ka kadu aituhu aviyaivia eha me Iudea wayahia Iesu ivitumahanei, akanai Yaubada yai goyona nua-piahi, e tau i vidoha tauna matana aitamoata deina.✧

³¹ Kadu aitam vi-tanai wayahimia taina.

✧ 3:29: Rom 10:12. ✧ 3:30: VV 6:4; Gal 3:20.

Aituhu yaka vidoha vin'-omo yaka vitumahana wayahina deina, medeina kana-vona Yaubada ya veimea wayahina? Nau-wawanika kamana-giboei ka kahapone-yavunei? Eha! Iuna ataina Yaubada ya veimea a paisewa ahiahina kadudueyei. Wayahina, nau-wawanika Yaubada ya veimea kawa-vidovidohei. Aitam pai dune avenemi, udueyei, e un'-anamanei.✧

4

Vitumahana-hoina A Pai Dune Abaraham

¹ Ka pai dune-nana vivane Abaraham, tauna itoka me Iudea wanohika. Nau-wawanika Abaraham yawaina kadueyei, ka aviani tauna vaniahei vitumahana wayahina kanuani. ² Tauna ya vidoha Yaubada matana eha ta-vin'-omo yana dewa wayahina. Aituhu Abaraham yana dewa tunuhina, akanai, tauna ana pata vona-vanevane tomotau mataia. Kate tauna eha ana pata na-vona-vanevane Yaubada matana. ³ Iuna Iginuma ivona deina,

“Abaraham Yaubada vitumahanei.

Wayahina, Yaubada awaehei vivane tauna tau tunutunuhina,
 eha aitam yana dewa goyona
 Yaubada matana deina.”✧

⁴ Avaha kanamanei, avi tuta tau paisewa ipaipaisewa, tau ai nau-pata eha am-venena awawaehina ai tau veimea wayahia, kate tau veimea nau-wawani yai tau paisewa

✧ **3:31:** Mat 5:17. ✧ **4:3:** Nao 15:6; Gal 3:6.

inau-pata-neiei yai paisewa wayahina. ⁵ Ka Yaubada yana dewa tunina. Aituhu aviyaivia eha ipaipaisewa yai ito-yavuha wayahina, kate aituhu tau i yai ito-yavuha ivaniahei yai vitumahana wayahina, akanai Yaubada dewa-haiawa tau i yai vitumahana wayahina. Vona ahiahina, tau i tau goyogoyona, kate Yaubada dewa-haiawa yai vitumahana wayahina. Wayahina, tau i ivi-tau tunutunuhi tauna matana deina.

⁶ Nonova Davida ipuipupu tau i ivi-tau tunutunuhi Yaubada matana wayahi. Ka Davida ivona aituhu aviyaivia eha ipaipaisewa, kate aituhu tau i ivi-tau tunutunuhi Yaubada matana iuna tauna ana heta wayahina ivaniahei, akanai tau i avaha nau-iaiava ananina ivaniahei deina. Davida ivona,

⁷ “Aituhu aviyaivia avaha nua-piaha
ivaniahei Yaubada wayahina,
ka aituhu aviyaivia wayahi
Yaubada avaha yai dewa goyona bwaei,
akanai, tau i avaha nau-iaiava ananina
ivaniahei deina!✧

⁸ Aituhu aviyaivia wayahi
Yaubada avaha yai dewa goyona nua-pania,
akanai, tau i idewa-haiawa ananina
nau-iaiavana wayahina!”

⁹ Ka itomi me Iudea anau-dadanemi vi-tanai tupwai wayahina. Itoka me Iudea medeina? Kaiwadi, Yaubada ya nuanua nau-iaiavaia vivane itoka me Iudea aka heta wayahika, iuna yaka

✧ 4:7: Sam 32:1-2.

aidaba mamaei? Avonemi eha. Yaubada ya nuanua kadu tau eha yai aidaba nau-iaiaivaia ivaniahei. Avaha kanuani,

“Abaraham Yaubada vitumahanei.
Wayahina, Yaubada awaehei vivane
tauna tau tunutunuhina,
eha aitam yana dewa goyona
Yaubada matana deina.”

¹⁰ Ka avi tuta Yaubada awaeha deina? Medeina? Naona Abaraham wagana dabei, e munia Yaubada yan' awaeha vin'-omo tauna wayahina? O kadi naona Yaubada yan' awaeha vin'-omo, e munia Abaraham wagana dabei?

¹¹ Udu! Naona Yaubada awaehei Abaraham tau tunutunuhina tauna matana. Iuna Abaraham ya vitumahana mamaei. Ka munia Yaubada dewa-dabadaba venei. Ka dewana vivane pai viwavenena ana heta Abaraham ya vitumahana wayahina. Ka kadu kana-vona aidabana pai ainana deina. Ka pai ainana viwaveneka Abaraham avaha vi-tau tunutunuhina Yaubada matana.

Wayahina, aituhu aviyaivia Yaubada ivitumahanei, tau habuhabui amai vivane Abaraham. Aituhu aviyaivia eha yai aidaba, ka aituhu Yaubada ivitumahanei, akanai, tau amai vivane Abaraham.^{☆ 12} Ka kadu itoka yaka aidaba deina. Aituhu Yaubada kavitumahanei, ka kadu aituhu itoka yawaika Abaraham yawaina deina, tutana tauna Yaubada vitumahanei, akanai tauka amaka vivane Abaraham. Aituhu aviyaivia

☆ **4:11:** Nao 17:10-11.

Yaubada ivitumahanei, Yaubada n'-awaehei tau tau tunutunuhi matana.

¹³ Yaubada Abaraham vona-dabedabei, ka Yaubada ivona deina, “Yauke nau-iaiaava avenem, ka apaina wanowanohim avenei deina, vivane tanopi habuhabuna evaniahei, aitam onoto amana yana gabu vaniahei deina.” Ka nau-wawanika kanuani, vona-dabadabana vin'-omo, kate Abaraham eha naona Yaubada ya veimea ta-vi-ateteye. Eha-ohota. Vona-dabadabana vin'-omo iuna naona Abaraham Yaubada yana vona vitumahanei.✧

¹⁴ Eha Yaubada ya nuanua naona tomotau ya veimea ivi-munie, e munia tauna nau-iaiaava vene. Aituhu Yaubada ya nuanua deina, akanai tau i vitumahanei yai vitumahana eha aitam aviani, ka kadu kana-vona Yaubada ya vona-dabadaba eha aitam aviani.^a ✧ ¹⁵ Yaubada nua-goyo yaka dewa goyona wayahi. Ka tauna ya nua-goyo wayahina aka dewa-yaiyai vin'-omo iuna itoka tauna ya veimea katana-bwegebwegei. Ka udu! Aituhu veimeana eha, eha aka pata veimeana katana-bwege.✧

¹⁶ Wayahina, Yaubada nau-iaiaava wayahina vona-dabadaba, ka itoka aka pata nau-iaiaavana kavaniahei vitumahana wayahina. Ka kadu kana-vona nau-iaiaavana vin'-omo wayahikaia Yaubada yan' am-venena awawaehina

✧ **4:13:** Nao 17:4-6; 22:17-18; Gal 3:29. **a 4:14:** Kadu aitam vo-vina ahiahina mataina taina wayahina deina: “Aituhu tomotau ai pata nau-iaiaava ivaniahe yai dewa wayahina, vona ahiahina, eha aitam iuna tau i yai vitumahana wayahina, ka kadu eha aitam iuna Yaubada ya vona-dabadaba wayahina.” ✧ **4:14:** Gal 3:18.

✧ **4:15:** Rom 3:20; 5:13.

wayahina. Ka nau-wawanika kan'-anamanei Yaubada ya vona-dabadabana boui tau vitumahana habuhabui wayahi. Eha itoka me Iudea aka heta Abaraham dayahina wayahina katupua. Kate aituhu aviyaivia Yaubada ivitumahanei, Abaraham deina, akanai kadu tau ai pata nau-iajavana ivaniahei.✧ ¹⁷ Ka Iginuma nihenina Yaubada ivona Abaraham wayahina deina, ivona,

“Yauke yau nuanua wamke ininim wayahina
tupua-nenenehi habuhabui ivin'-omo,
tau habuhabui ivi-wahanim ‘Amau’.”

Wayahina, Yaubada matana itoka tau vitumahana amaka vivane Abaraham, iuna Abaraham Yaubada vitumahanei. Ka Yaubada bagibagi-vainena. Tauna tomotau aninigai si-vi-mini-havine yawayawai. Ka kadu dewaia eha aka pata kadudueye, tauna dewaia wayahi ipuipupu, kadu apa-taputapuei, ka kadu vona-dabadaba wayahi munia iomomo.✧

¹⁸ Abaraham vona-dabadabana vitumahanei. Kaiwadi, aituhu vona-dabadabana kanononi, kava-hamwahamwana, o kanuanua, “Eha ana pata dewana vin'-omo.” Kate Abaraham onoto tunina. Wayahina, tauna ya nua-vaniaha nui potapota a itoava Yaubada ya vona-dabadabana ya tupua-nenenehi wayahi vaniahei wayahina. Iuna Yaubada avaha vona-dabedabeyei,

“Apaina wamke yam tupua-nenenehi

✧ **4:16:** Gal 3:7. ✧ **4:17:** Nao 17:5.

habu-vainei imamaei,
tau ai yau wadima ai yau deina.”☆

¹⁹ Ka vona ahiahina, Abaraham avaha a ponimana 100 vaniahei, ka tauna avaha anamanei ininina ihanua, ka kadu avaha anamanei awana Sara gagana ka madina ihanua deina. Kate Abaraham ya vitumahana bagibagina eha ta-ihanua.☆ ²⁰ Ka eha ta-va-hamwahamwana, kate tauna Yaubada ya vona-dabadaba vitumahanei. Ika, ya vitumahana natanata, ka tauna ate-vatu vaniahei, ka Yaubada didigana vo-vi-natei yana dewa wayahina deina. ²¹ Iuna Abaraham vitumahanei vivane Yaubada ya vona-dabadaba kadu ya bagibagi vivane aitamoata. ²² Wayahina,

“Yaubada awaehei tauna tau tunutunuhina,
eha aitam yana dewa goyona
Yaubada matana deina.”☆

²³ Yaubada tauna a tau apa-taputapu awaehei tauna vonaia Iginuma nihenina ginumi,

“Yaubada awaehei tauna tau tunutunuhina,
eha aitam yana dewa goyona
Yaubada matana deina.”

Ka eha Yaubada ya nuanua Abaraham ana heta vonaia na-nononi, ²⁴ kate Yaubada ya nuanua aituhu aviyavia ivitumahanei tauna avaha yaka Kauvea Iesu anigea si-vi-mini-havinei, akanai

☆ **4:18:** Nao 15:5. ☆ **4:19:** Nao 17:17. ☆ **4:22:** Nao 15:6.

taui nau-wawani ivi-tau tunutunuhi Yaubada matana aitamoata deina. ²⁵ Yaubada awaehei yaka Kauvea Iesu aniga. Ka tauna yan' aniga vivane patana itoka yaka dewa goyona wayahi. Iakwa, e Yaubada yaka Kauvea Iesu anigea si-vi-mini-havinei. Ka ya mini-havine viwaveneka Yaubada ya vona-dabadaba vona tunutunuhina. Wayahina, tutana tauna voneka itoka tau tunutunuhika tauna matana yaka vitumahana ana heta wayahina, itoka vivane tau tunutunuhika akanai.☆

5

Itoka Tau Tunutunuhika Yaubada Matana

¹ Wayahina, ataina tuta Yaubada avaha awaeheka kavi-tau tunutunuhika tauna matana itoka yaka vitumahana wayahina. Wayahina, Yaubada nui kavi-niana, ka kadu nua gomagomanina kavaniahei yaka Kauvea Iesu Tau Ito-yavuha wayahina. ² Iuna yaka vitumahana tunuhina Iesu wayahina awaeheka Yaubada yan' am-venena awawaehina wayahikaia kavaniahei. Ka Yaubada yan' am-venena awawaehina wayahikaia vivane ma'-vavaha, ka avaha kamimini nihenina. Ka kadu ataina kadewa-haiawa iuna yaka nua-vaniaha nui kapotapota a itoava Yaubada tauna didigana vo-pataka wayahina. ³ Ka avi tuta inahē ivin'-omo wayahikaia, akanai kadu kadewa-haiawa, iuna avaha kanamanei yaka gwahea vin'-omo inahē wayahina,☆ ⁴ ka aituhu nau-dadana nihenina kagwagwaheyei,

☆ 4:25: Isa 53:4-5. ☆ 5:3: Iam 1:2-3; 1Pi 1:5-7.

e munia nuaka ibagibagi. Ka aituhu nuaka ibagibagi, akanai aka pata yaka nua-vaniaha nui kapotapota. ⁵ Ka aituhu aka pata yaka nua-vaniaha nui kapotapota, apaina eha kana-ini-yauyau Yaubada matana. Iuna Yaubada tauna Nuana Ahihinata veneka, ka Nuana Ahihinata nuaka nau-vi-anai Yaubada ya dune-nuanuai wayahina.

⁶ Nonova goyona itoka tomotau bag-ibagi-tawaneka, ka eha ani-hoina vunuka kan'-aniga-vavaha. Kate tuta ahiahina wayahina, Tau Ito-yavuha vin'-omo, e tauna aniga itoka tau goyogoyoka wayahika. ⁷ Aituhu yaiaka tunutunuhi ai havia yai nuanua ina-nau-vi-anigi, eha memeanina itoka tomotau wayahikaia yawaika kan'-awaehei kavi-tau nau-seana yaiaka wayahi, e ai havia kan'-awaehei tauka ina-nau-vi-anigika, ka yaiaka eha. Kaiwadi, aituhu aitam onoto a niam ahiahina dune-nuanuaiei ananina, ka kadu aituhu onoto-nana yan' ate-vatu ani-vainena, akanai tauna kadi a niam ai havia n'-awaehei tauna ina-nau-vi-anigi, ka a niam eha. Kaiwadi, dewana vin'-omo, o eha. ⁸ Kate udueyei! Nonova itoka tomotau Yaubada a havia, kate tauna dune-nuanuaieka. Ka yaka Tau Ito-yavuha aniga itoka tau goyogoyoka wayahika, ka Yaubada tauna ya dune-nuanuai a bagibagi wayahika viwaveneka Iesu yan' aniga wayahina. Ka kanamanei Yaubada yana dewa vivane ahihi-vainena deina.*

⁹ Ka Yaubada avaha awaeheka kavi-tau

* 5:8: Ioni 3:16; 1Ia 4:10.

tunutunuhika tauna matana, iuna Iesu dayahina vivane nau-pata yaka goyona wayahina. Wayahina, kan'-anamanei apaina tauna kadu na-ito-yavuhika dewa-yaiyai wayahina! Ka dewa-yaiyai-nana omomo tau goyogoyona wayahia, iuna Yaubada ya nua-goyo wayahina.✧
¹⁰ Vona ahiahina, nonova itoka Yaubada a havia, kate tauna avaha awaehaka tunutunuhika tauna matana, e kavi-niana wayahina, iuna natuna aniga wayahika. Wayahina, ataina avaha kavi-niana Yaubada wayahina, ka dewana dewa-bagibagina. Ka apaina Iesu yawaina na-ito-yavuhi-vavahika. Ka dewana vivane dewa-bagibagi-vainena. ¹¹ Ka ataina kadewa-haiawa ananina kadu Yaubada kanau-kaiwei Iesu yana dewa wayahina, iuna kavi-niana Yaubada wayahina Iesu ya paisewa wayahina.

¹² Nonova dewa goyona omo tanopia onoto aitamoata wayahina, ana wava Adam, ka kadu dewa goyo-nana aniga omanei tanopia, ka aniga-nana omo tomotau habuhabuka wayahikaia, iuna habuhabuka dewa goyona kadedewei.✧ ¹³ Udu! Naona goyona vin'-omo tanopia, ka munia Yaubada tauna ya veimea Mosese venei mamaei. Kate naona Yaubada eha tomotau yai goyona ta-iaiava, iuna tauna ya veimea eha wayahia. Wayahina, tau eha ai pata veimeana itana-bwege.✧ ¹⁴ Kate vona ahiahina, tomotau habuhabui ianianiga, Adam yana tuta wayahina a itoava Mosese yana tuta wayahina.

✧ **5:9:** Rom 1:18; 2:5; Epe 2:3-5. ✧ **5:12:** Nao 3:6; Rom 6:23.

✧ **5:13:** Rom 4:15.

Ika, aniga tomotau habuhabui bagibagi-tawanei. Ka tupwai wayahia eha yai dewa Adam yana dewa deina. Adam a veimea Yaubada wayahina tana-bwegei. Ka kana-vona Adam vivane pai dune kadu aitam onoto munia omomo wayahina.

¹⁵ Nonova tomotau habuhabuka aniga kavaniahei Adam yana dewa goyona naona wayahina. Kate munia Yaubada tauna yan' am-venena awawaehina si-vin'-omanei tomotau habuhabuka wayahikaia, ka Yaubada yan' am-venena awawaehina Adam yana dewa goyona bagibagi-tawanei. Iuna onoto aitamoata (Adam) dewa goyona dewei, ka dewana aniga omanei aitamoata aitamoata wayahikaia. Ka onoto aitamoata (Iesu) am-venena awawaehina omanei aitamoata aitamoata wayahikaia. Ka Iesu yana dewa Adam yana dewa bagibagi-tawanei. ¹⁶ Ka avona-havine, onoto aitamoata (Adam) yana dewa goyona aniga omanei tanopia, ka munia tomotau habuhabuka nau-wawanika kan'-aniga. Kate Yaubada yan' am-venena awawaehina eha dewana deina. Iuna Adam yana dewa goyona aitamoata, e munia vitana matana Yaubada wayahina vin'-omo habuhabuka wayahikaia. Kate, udu! Itoka tomotau yaka dewa goyona vi-habu-vaine, kate ataina Yaubada yaka goyona nua-piahi-neiei yan' am-venena awawaehina wayahina, ka kadu ataina tauna awaeheka kavi-tau tunutunuhika tauna matana. ¹⁷ Vona ahiahina, aniga vin'-omo onoto aitamoata (Adam) ana heta yana dewa goyona wayahina, ka aniga itoka tomotau habuhabuka veimeyeka.

Ka onoto v^l-inuana (Iesu Tau Ito-yavuha) yana dewa vivane bagibagi-vainena. Ka aituhu aviyaivia Yaubada yan' am-venena awawaehina ani-vainena ivaniahei, ivi-tau tunutunuhi Yaubada matana, akanai tau i yawai-vavaha ivaniahei, ka kadu Iesu Tau Ito-yavuha nui ivi-tau veimea deina. ¹⁸ Wayahina kadueyei, onoto aitamoata yana dewa goyona wayahina, itoka tomotau habuhabuka aka dewa-yaiyai kavaniahei, vivane aniga. Ka kadu deina, kana-vona onoto aitamoata yana dewa tunutunuhina wayahina, itoka tomotau habuhabuka aka pata kavi-tau tunutunuhika kadu aka pata yawai-vavaha kavaniahei.✧

¹⁹ Ka kadue kana-vona onoto aitamoata eha Yaubada movina ta-vi-ateteye. Wayahina, habuhabuka kavi-tau goyogoyona, iuna tauna vivane wanohika. Kadu udu! Onoto aitamoata Yaubada movina vi-ateteyei. Wayahina, Yaubada awaehei habuhabuka kavi-tau tunutunuhika.✧

²⁰ Vona ahiahina, nonova Yaubada tauna ya veimea me Isiraeli venei. Ka tauna ya nuanua veimeana tau i yai dewa goyona si-vin^l-omanei memeanina idudueyei deina. Ka vona ahiahina, munia me Isiraeli yai dewa goyona nata. Ka tuta ataina wayahina Yaubada tauna yan' am-venena awawaehina veneka, ka vona ahiahina, am-venena awawaehina dewa goyona nata-tawanei. ²¹ Wayahina, kana-vona nonova a itoava tuta ataina wayahina goyona veimeyeka aitam kiniV deina, ka goyona a bagibagi vivane aniga. Ka kana-vona tuta ataina

✧ 5:18: 1Ko 15:22. ✧ 5:19: Isa 53:11.

wayahina am-venena awawaehina kadu aitam kiniV deina, ka ana pata yawai-vavaha veneka. Ka am-venena awawaehina a bagibagi vivane dewa tunutunuhina. Ka yawai-vavaha kavaniahei Iesu Tau Ito-yavuha yaka Kauvea wayahina.✧

6

Iesu Yan' Aniga Kadu Ya Mini-havine

¹ Medaina kana-vona dewa goyona wayahina? Tupwai tomotau ivonavona aituhu dewa goyona kadedewei, Yaubada yan' am-venena awawaehina kavo-vi-natei deina. ² Kate tomotau avonei, “Eha-ohota!” Itoka tau ekalesia avaha kaniga dewa goyona wayahina. Ka tuta ataina wayahina itoka vivane tau mate deina yawaika tanopia taina wayahina. Wayahina, tuta ataina itoka eha aka pata dewa goyona wayahina kadewa-haiawa. ³ Kaiwadi, itomi eha uta-nua-hau aka bapitaiso an' anamana wayahina, a? Nonova habuhabuka kabapitaiso Tau Ito-yavuha Iesu nihenina. Ka tutana kabapitaiso deina, dewana an' anamana itoka Iesu yan' aniga kavaniahei deina.✧ ⁴ Tutana kabapitaiso dewana an' anamana itavunika, nonova Iesu aniga, e itavuni deina. Kate Amaka tauna didigana wayahina Iesu anigea si-vi-mini-havinei, e yawaina vovouna venei. Wayahina, itoka kadu deina, yawaika vovouna kavaniahei Yaubada ya bagibagi wayahina.✧

⁵ Aituhu avaha yan' aniga kavaniahei aitamoata deina, vona ahiahina, apaina kadu ya mini-havine kavaniahei aitamoata deina.

✧ 5:21: Rom 6:23. ✧ 6:3: Gal 3:27. ✧ 6:4: Kol 2:12.

⁶ Avaha kanamanei yawaika tutuaina tauna nui ai nahenahea itutu-pwataka deina, e tauna nui kaniga iakwa deina. Iuna Yaubada ya nuanua yawaika goyona na-iakwa. Aituhu itoka aninigaka deina, eha aka pata kadu aitam tuta wayahina kavi-tau paisewa goyona wayahina.✧

⁷ Udu! Aituhu aviyaivia aninigai, tau i avaha iyavuhi goyona a bagibagi wayahina. Ka goyona eha ana pata tau anianiga vi-one-havine.

⁸ Aituhu ataina itoka avaha Tau Ito-yavuha nui kaniga, kadu kavitumahanei apaina tauna nui yawayawaika kamamaei. ⁹ Iuna kanamanei Tau Ito-yavuha avaha anigea mini-havine. Wayahina, tauna eha ana pata n'-aniga-havine. Aniga eha ana pata tauna veimeye-havine. ¹⁰ Vona ahi-ahina, tutana tauna aniga, tauna aniga tuta aita-moata wayahina, ka tauna dewa goyona a papani ni-tawanei deina. Wayahina, ataina tauna ma'-vavaha Yaubada matana.

¹¹ Ka kadu itomi nau-wawanimi unuanua avaha uaniga dewa goyona wayahina, ka ataina yawaimi vovouna avaha uvaniahei Yaubada wayahina, e yawayawaimi umamaei Tau Ito-yavuha Iesu nihenina.✧

Ataina Goyona Eha Aka Tau Veimea

¹² Wayahina, eha nau-wawanimi goyona uawaehe ininimi na-veimeye. Aituhu goyona ininimi veimeyei, apaina goyona uvi-ateteye, e goyona ya nuanua udedewei.✧ ¹³ Udu! Yaubada avaha anigea omanemi, ka tauna nau-wawani na-veimeyemi. Wayahina, eha hutami o nuami

✧ **6:6:** Gal 5:24. ✧ **6:11:** 2Ko 5:15; Gal 2:19. ✧ **6:12:** Nao 4:7.

uawaehe dewa goyona wayahina udedewe. Kate nau-wawanimi hutami kadu nuami un'-awaehei Yaubada wayahina, e tauna veimeyemi, e dewa tunutunuhina udedewei hutami ka nuami wayahia deina.✧ ¹⁴ Ataina goyona eha yami kauvea. Aituhu goyona uawaehei veimeyemi, dewana eha tunuhina. Iuna nonova Yaubada ya veimea veimeyeka, kate tauna yavuhika veimeana wayahina. Ka ataina am-venena awawaehina yawaika veimeyei. Wayahina, eha nau-wawanika yawaika kan'-awaehe dewa goyona wayahina.✧

Tau Paisewa Dewa Tunutunuhina Wayahina

¹⁵ Ataina Yaubada yan' am-venena awawaehina veimeyeka. Aituhu Yaubada ya veimea eha veimeyeka, itoka yaka dewa medeina? Tupwai tomotau ivonavona aka pata dewa goyona kadewa-kavokavovoei. Avonemi eha-ohota! ¹⁶ Kaiwadi, itomi avaha unua-hau i o eha? Aituhu ininimi uawaehei uvi-tau paisewa aitam tomotau wayahina, akanai tomotau-nana vivane yami kauvea, ka tauna ana pata veimeyemi. Aituhu goyona veimeyemi, munia aniga uvaniahei. O aituhu Yaubada uvi-ateteyei, ka aituhu tauna veimeyemi deina, akanai itomi tau tunutunuhimi umamaei tauna matana.✧ ¹⁷ Nonova goyona udedewei. Kate ataina anau-kaiwa ananina Yaubada wayahina! Iuna tutana vona tunuhina Vaneana Ahiahina wayahina iviwavenemi, itomi unononi, ka vonana uvitumahanei, e uvi-putu viwavenena uvi-ateteyei. ¹⁸ Wayahina, kadueyei

✧ **6:13:** Rom 12:1. ✧ **6:14:** 1Io 3:6. ✧ **6:16:** Ioni 8:34; 2Pi 2:19.

Yaubada dewa goyona wayahina tana-vewanimi, e ito-yavuhimi deina. Ka ataina itomi yami kauvea vivane dewa tunutunuhina, ka dewa tunutunuhina udedewei.

¹⁹ Vona tana-minikuna taina wayahina avonavona, iuna yau nuanua viwavenena taina avo-vi-meani wayahimia. Aituhu eha avo-vi-meani, eha ami pata unua-hau. Nonova itomi hutami aitamoata aitamoata kadu nuami dewa goyona wayahina uawaehei. Wayahina, dewa goyona natanata nihenimia deina. Ka ataina nau-wawanimi hutami aitamoata aitamoata kadu nuami dewa tunutunuhina wayahina uawaehei. Ka ataina nihenimia dewa tunutunuhina natanata, ka eta-naoemi dewa ahihinata wayahina.

Yaubada Yan' Am-venena Awawaehina

²⁰ Nonova goyona veimeyemi, ka itomi vivane goyona a tau paisewa-kavokavovo. Wayahina, nonova dewa tunutunuhina eha ta-veimeyemi, iuna yami kauvea vivane goyona. ²¹ Ka aviani ahiahina uvaniahe dewa goyo-naia wayahia? Eha aitam. Vona ahiahina, tuta ataina wayahina itomi uaini-yauyau dewa goyo-naia wayahi. Aituhu aviyaivia dewa goyo-naia idedewei, munia tau aniga ivaniahei akanai.

²² Kate Yaubada dewa goyona wayahina tana-vewanimi, e ito-yavuhimi. Ka avaha uvi-tau paisewa-kavokavovo Yaubada wayahina, ka ataina tauna ana heta uvi-ateteyei. Ka aviani ahiahina uvaniahei tauna wayahina? Vona ahiahina, tauna nau-iaiava venevenemi, ka ataina dewa tunutunuhina eta-naoemi

uvi-tau ahihimiata. Ka apaina, tuta pai nau-yehata wayahina, yawai-vavaha uvaniahei. ²³ Aituhu dewa goyona kapisewei, aka nau-pata dewa goyo-naia wayahina vivane aniga. Kate eha aka pata kapisewa Yaubada yan' am-venena wayahina. Eha. Tauna yan' am-venena wayahikaia vivane awawaehina, kadu am-vene-nana vivane yawai-vavaha yaka Tau Ito-yavuha Iesu nihenina. Ka tauna vivane yaka Kauvea.✧

7

Pai Dune Tavine Wayahina

¹ Me Isiraeli, itomi vavaneiu, ka avaha Mosese ya veimea kanamanei. Wayahina, unononi. Mosese ya veimea yawaika veimeyei a itoava kan'-aniga wayahina. Ka munia, aituhu aviyaivia avaha ianiga, akanai veimeana iakwa tau wayahi, a? ² Pai dune aitam matamia aboui udueyei tavine wayahina. Aitam veimea mamaei, ivona vaivine tavitavinei nau-wawani yai onoto nui imamaei a itoava yai onoto ianiga wayahina. Aituhu yai onoto avaha ianiga, veimeana eha aitam aviani vaivinei wayahia. Iuna ataina vaivinei eha tavitavinei. ³ Ka aituhu yai onoto yawayawai imamaei, ka aituhu vaivinei ini-tawanei, e mani ononoto itavine-tamanei, kana-vona vaivinei vivane tau kenekenenei. Kate aituhu vaivinei yai onoto avaha inusi, tavine a veimea eha vaivinei ta-veimeye. Aituhu vaivinei yai nuanua mani

✧ **6:23:** Rom 5:12, 15.

ononotoi itavine, akanai itavine. Dewana eha kenene. Iuna yai onoto naona avaha inusi.

⁴ Wayahina, vavaneiu, itomi tau ekalesia vaivinei deina. Mosese ya veimea wayahina aipupupu unononi. Nonova Mosese ya veimea habuhabuna veimeyemi, ka kana-vona tuta nonova veimeana awami deina. Ka tutana Iesu aniga, e yan' aniga an' anamana wayahimi vivane itomi kadu uaniga aitamoata deina. Wayahina, ataina, aituhu itomi aninigami deina, vona ahiahina, Mosese ya veimea eha ana pata na-veimeyemi. Ka Iesu yan' aniga munina, tauna anigea mini-havine. Ka ataina kadu itomi tauna nui umini-havine deina. Ka kana-vona ataina itomi vivane Iesu ininina hutana avaha Iesu utavinei deina. Wayahina, ataina awami vovouna Iesu, ka kadu ataina tauna ya nuanua Yaubada ya paisewa upaipaisewei.✧

⁵ Nonova itoka yaka nuanua tutuaina kavi-munie, ka ataina tau eha Yaubada it'-anamane idedewei deina. Ika, nonova yaka nuanua goyona vivane waipei deina. Ka tutana Yaubada ya veimea kanononi veimeana wei deina. Wayahina, goyona gabuna itabotabo waipei-naia wayahia, e dewa goyona vin'-omo-nananena ininikaia deina. Wayahina, yaka dewa habuhabuna a pai nau-yehata vivane aniga.

⁶ Nonova veimeana yohonika ka yawaika veimeyeyi. Kate ataina tuta, yaka nuanua goyona kadu tutuaina avaha aniga. Ka Iesu Tau Ito-yavuha avaha veimeana wayahina

✧ 7:4: Rom 6:2, 11.

ito-yavuhika. Wayahina, tuta ataina yaka dewa eha ta-vin'-omo veimeana tutuaina nonova Mosese ginumi wayahina. Eha. Tuta ataina yaka dewa vin'-omo etawana vovouna wayahina, vivane Yaubada Nuana Ahihinata wayahina.✧

⁷ Wayahina, tuta ataina medeina kana-vona Mosese ya veimea wayahina? Kaiwadi, kana-vona Mosese ya veimea ana heta vivane goyona? Eha-ohota! Iuna Mosese ya veimea dewa ahiahina taina dedewei. Veimeana yaka dewa goyona viwaveneka kan'-anamanei. Naona eha nuanua goyona kat'-anamane. Ka tutana veimeana anononi, ivona, “Eha nuanuam goyona,” e auyewana wayahina nuanua goyona niheniua avaniahei.✧ ⁸ Ka munia dewa goyona veimeana bagibagi-tawanei, e avi-putu nuanuau dewa goyona habuhabui. Mosese ya veimea avi dewa ahiahina, kadu avi dewa goyona mataedaka. Ka unononi. Aituhu veimea eha mamae, dewa goyona eha ana pata. Ka dewa goyona ivin'-omo iuna veimeana dewaia vito-potai.

⁹ Yauke kadu avaniahei deina. Tuta nonova yauke amamaei ahiahiu, iuna eha Yaubada ya veimea at'-anamane. Kate tutana veimeana anononi, tuta aitamoata wayahina goyona vin'-omo wayahiua, ¹⁰ e yauke aniga nuau nihenina. Yaubada ya nuanua yawaiu vidoha veimeana wayahina. Kate veimeana wayahina yau aniga nuau nihenina vin'-omo. ¹¹ Udu. Goyona aitam tuta ahiahina vaniahei veimeana a vin'-omana wayahina, e goyona

✧ **7:6:** Rom 8:2; 6:4. ✧ **7:7:** NiT 20:17; VV 5:21.

nonou. Ika, goyona voneu aituhu yauke yau nuanua adedewei, ka aituhu veimeana atana-bwegebwegei deina, akanai munia adewa-haiawa. E goyona nau-vi-anigiū nuau nihenina deina. Iuna avaha veimeana atana-bwegei, au dewa-yaiyai Yaubada wayahina vivane aniga!✧

¹² Wayahina, kadueyei Yaubada ya veimea habuhabuna ahihinata, ka kadu tauna ya vito-pota aitamoata aitamoata ahihinata kadu tunutunuhina.✧ ¹³ Kate, medeina kana-vona? Aituhu kana-vona, “Yaubada ya veimea ahihinata nau-vi-anigiū nuau nihenina,” vonana vona ahiahina? Eha-ohota! Eha nau-wawanika kavonavona deina. Vona ahiahina, goyona nau-vi-anigiū nuau nihenina. Goyona veimea ahihinata epei ya punumai deina, e veimeana wayahina vunu nau-vi-anigiū. Wayahina, itoka tomotau aka pata dewana kadueyei, kadu aka pata kan'-anamanei goyona ana dewa vivane goyogoyonata akanai.

Nuaka Kadu Ininika Ainua Yai Dewa

¹⁴ Avaha kanamanei Yaubada ya nuanua nu-aka vidoha tauna ya veimeana wayahina. Kate eha au pata veimeana avi-ateteye tunuhina, iuna yauke tau ma' tanopi, ka ininiu ihanua. Wayahina, kana-vona yauke vivane dewa goyona a tau paisewa-kavokavovo aitam. ¹⁵ Ka kadu yauke yau dewa eha avi-nua-uye ahiahina. Iuna aituhu yau nuanua dewa ahiahina adedewe,

✧ 7:11: Nao 3:13. ✧ 7:12: 1Ti 1:8.

eha au pata. Vona ahiahina, avi dewa goyona anau-nikonikoiei, akanai dewaia adedewei.✧
 16 Wayahina, udu! Aituhu yauke avaha dewaia goyona anau-nikonikoiei, ka aituhu dewaia adedewei, vona ahiahina, yauke Yaubada ya veimea awaehei vivane tunutunuhina. 17 Yauke au heta eha dewa goyo-naia ata-dedewe, kate goyona niheniua mamaei, ka vona ahiahina, dewa goyo-naia ivin'-omo-nananena goyo-nana niheniua wayahina. 18 Yauke avaha anamanei eha aitam dewa ahiahina ininiu nihenina mamae. Iuna yau nuanua dewa ahiahina adedewe, kate au heta eha au pata adedewe deina.

19 Wayahina, kadueyei yau dewa eha ivin'-omo yau nuanua wayahina. Iuna yau nuanua dewa ahiahina adedewe, kate dewa goyona ivin'-omo-nananena wayahiua. 20 Unononi. Aituhu yau dewa eha ivin'-omo yau nuanua wayahina, vona ahiahina, yauke au heta eha yau dewa aveimeye. Kate goyona niheniua mamaei, e goyo-nana veimeyeu kadu dewa goyo-naia dedewei.

21 Wayahina, yawaiu a venavenau taina. Avi tuta nuanuau dewa ahiahina adedewei, akanai tuta aitamoata wayahina kadu goyona nui amamaei. 22 Yauke Yaubada ya veimea habuhabuna awaehei ahiahina nuau nihenina. 23 Kate mani veimea paipaisewa ininiu hutana nihenia. Wayahina, tuta tuta veimea-naia ainua ivi-naua ananina. Yaubada ya veimea nuau veimeyei, ka kadu goyona ininiu hutana veimeyei. Ka tuta tuta goyona yohoyohoniu, e

✧ 7:15: Gal 5:17.

yauke avi-tau paisewa-kavokavovo goyona ya nuanua wayahina.✧ ²⁴ Aioi! Goyou! Ininiu ana dewa goyona taina a pai nau-yehata vivane aniga ana heta. Koiaka ana pata na-ito-yavuhui? ²⁵ Ataina anau-kaiwa ananina Yaubada wayahina, iuna Iesu Tau Ito-yavuha yaka Kauvea ana pata na-ito-yavuhui akanai!

Wayahina, yau ipupu avo-vi-kutei taina deina. Nuau nihenina yauke Yaubada ya veimea awaehei vivane dewa ahiahina, ka kadu nuau nihenina avi-tau paisewa-kavokavovo tauna ya veimeana wayahina. Kate ininiu nihenina goyona veimeyeu avi-tau paisewa-kavokavovo goyona wayahina.✧

8

¹ Ka pai nau-yehata wayahina, yau ipupu a nau-itava ananina taina. Aituhu aviyaivia wayahikaia avaha Tau Ito-yavuha Iesu nui kavi-niana, tauka vivane Iesu hutana, ka tauna nihenina kamamaei. Wayahina, tuta ataina eha aitam aka dewa-yaiyai potapotaka yaka goyona wayahi. ² Iuna ataina Yaubada Nuana veimeyeka, kadu tauna avaha ito-yavuhika veimeana tutuaina wayahina. Nonova goyona omo wayahikaia veimeana tutuaina wayahina, e goyo-nana veimeyeka goyona kadedewei, e dewa goyo-naia ai nau-pata vivane aniga kavaniahai. Kate Yaubada Nuana Ahihinata omo wayahikaia, e tauna yawai-vavaha veneka, iuna itoka vivane Tau Ito-yavuha Iesu hutana. ³⁻⁴ Mosese ya veimea

✧ **7:23:** Gal 5:17; 1Pi 2:11. ✧ **7:25:** 1Ko 15:57.

eha ana pata yawai-vavaha na-veneka, iuna itoka tomotau ininika ihanuana. Wayahina, aviani veimeana veimeyeka, itoka eha aka pata, ka kavihahaiei, ka kadu katana-bwegebwegei.

Udu! Itoka eha aka pata, kate Yaubada ana pata. Ka kadu tauna avaha yawai-vavaha veneka. Ika! Yaubada etawana tunina vo-vi-aiaia itoka tau ihanua wayahika. Iuna tauna ya veimea tunutunuhina nihenina ivona, yaka goyona a nau-pata vivane yaka aniga. Ka Yaubada tauna Natu-hoina vi-tunei omo tanopia, ka tauna ya tupua itoka yaka tupua aitamoata deina, kadu ininina itoka ininika aitamoata deina. Ka Iesu tauna ininina awaehei vi-pai vi-nomu itoka wayahika, e tauna vi-nau-pata itoka yaka goyona wayahi deina. Ka yan' aniga wayahina tauna goyona a bagibagi vita-vovoni. Ka Yaubada Nuana bagibagina. Wayahina, ataina tuta aituhu Yaubada Nuana kavi-ateteyei, akanai goyona eha ana pata na-veimeyeka.*

⁵⁻⁶ Aituhu aviyaivia iawaehei goyona tau i yai nuanua veimeyeyei, akanai tau inini nihenina dewa goyona idedewei, ka tuta pai nau-yehata wayahina tau ai nau-pata dewa goyo-naia ivaniahei vivane aniga ainua. Aitam aniga inini nihenina ivaniahei, ka kadu aitam aniga nuai nihenina ivaniahei. Kate aituhu aviyaivia iawaehei Yaubada Nuana tau i yai nuanua veimeyeyei, ka aituhu tau i Nuana ivi-ateteyeyei, akanai tau i yawai-vavaha ivaniahei, kadu nua gomagomantina Yaubada wayahina ivaniahei.

* **8:3-4:** Gal 5:16, 25.

⁷ Aituhu aviyaivia iawaehei goyona tau i yai nuanua veimeyei, vona ahiahina, tau i vivane Yaubada a havia. Iuna tau i Yaubada ya veimea itana-bwegebwegei, ka kadu tau i eha ai pata tauna ya veimea ivi-ateteye. ⁸ Wayahina, aituhu aviyaivia iawaehei goyona tau i yai nuanua veimeyei, tau i eha ai pata Yaubada ivo-vi-dewa-haiawi.

⁹ Yaiau, itomi eha tomotau i deina. Aituhu Yaubada Nuana nihenimia mamaei, goyona eha veimeyemi, kate Yaubada Nuana veimeyemi. Aituhu aviyaivia eha Iesu Nuana nui imamae, tau i eha Iesu hutana aitam.✧ ¹⁰ Vona ahiahina, tuta ataina aniga uayaunei ininimia, ka apaina ininimi ianiga, iuna goyona ininika veimeyei deina. Kate aituhu Iesu nihenimia mamaei, akanai nuami avaha yawai-vavaha vaniahei. Iuna tauna yana dewa tunutunuhina wayahina.✧ ¹¹ Unuani! Yaubada Iesu anigea si-vi-mini-havinei. Wayahina, aituhu Yaubada Nuana bagibagina nihenimia mamaei, tauna ana pata ininimi anigea na-si-vi-mini-havinei aita-moata deina.

page top Nau-wawanika Inahe Kavanიაhei Iesu Deina

¹² Wayahina, vavaneiu, itoka nau-wawanika yawaika vidoha Yaubada natunatuna aitamoata deina. Eha nau-wawanika dewa goyona ininikaia kawaehe kadedewe. ¹³ Aituhu dewa goyona unua-tania, ka aituhu ininimi nihenina ud-edewei, yawai-vavaha ututu-haini deina, ka apaina un'-aniga. Kate aituhu itomi Yaubada

✧ **8:9:** 1Ko 3:16; 12:3. ✧ **8:10:** Gal 2:20.

Nuana ya bagibagi nui yami dewa goyona uvita-vovoni, akanai yawai-vavaha uvaniahei, upoy'-avini.*

14-15 Nonova itomi umatamatauta aniga wayahina, iuna aniga bagibagina. Kate aituhu Yaubada Nuana uawaehei na-nu nihenimia kadu veimeyemi, akaka Yaubada n'-awaehehi itomi vivane natunatuna. Yaubada Nuana eha ta-yohonimi uvi-tau paisewa-kavokavovo matauta wayahina, nonova deina. Kate Yaubada Nuana nuami vo-vinei, ka ataina itomi Yaubada natunatuna. Ka aituhu aviyaivia iawaehei Yaubada Nuana yawai veimeyei, vona ahiahina, tau Yaubada natunatuna. E Yaubada Nuana eta-naoeke, e Yaubada kavi-wahani, "AbaV, Amau!"* * 16 Ka Yaubada Nuana kadu itoka nuaka ainua iawaehei aitamoata deina vivane itoka Yaubada natunatuna.* 17 Wayahina, ataina, aituhu Tau Ito-yavuha ana inahe kavaniahei, ka kadu aituhu inahe-naia nihenina katoha-vi-anai nonova Iesu toha-vi-anai deina, akanai itoka nau-wawanika Yaubada yana gabu kavaniahei, Tau Ito-yavuha avaha yana gabu vaniahei aitamoata deina. Ka aituhu tuta ataina kadedewei deina, apaina Iesu tauna didigana na-vo-pataka vivane itoka didigaka.

Didigaka Tuta Tepakaia

18 Ataina itoka inahe kavaniahei tanopia, ka apaina didigaka kavaniahei wahuma. Ka avonemi aituhu aka inahe ataina ka didigaka apaina ainua kabou-viwavei, didigaka apaina

* 8:13: Gal 6:8; Kol 3:5. * 8:14-15: Gal 4:5-7; SiV 21:7.

* 8:14-15: 2Ti 1:7; Mar 14:36. * 8:16: 2Ko 1:22.

aka inahē ataina vane-tawane-vainei. ¹⁹ Vona ahiahina, Yaubada ya vevewana^a habuhabui ipotapota (tomotau ipotapota deina) kadu nuanuai ananina Yaubada tauna natunatuna habuhabui na-si-vin'-omaneī idudueyei. ²⁰ Nonova, tutana Yaubada Adam ka Eve bwanatai tauī yai goyona wayahina, tauna kadu ya vevewana habuhabui bwanatai aitamoata deina. Ya vevewana eha aitam yai dewa goyona, kate Yaubada kadu tauī bwanatai deina. Tauna tanopi vo-vineī, e memeanina mata-duduna vin'-omo, kate vitana uana vin'-omo. Yaubada tauna ya nua-vaniaha nui ya vevewana habuhabuna bou-opuei deina, kate ya nuanua[✧] ²¹ apaina, aitam auyewa wayahina, ya bwanatana na-haponei ividoha. Ka auyewana wayahina Yaubada tauna ya vevewana na-ito-yavuhi bwanata aitamoata aitamoata wayahina, itoka natunatuna na-ito-yavuhika aitamoata deina. Ka apaina Yaubada tauna didigana ya vevewana vo-patai, tauna didigana na-vo-pataka deina.

²² Tuta naona a itoava tuta ataina wayahina, Yaubada ya vevewanaia ibebewewa, itoutou, vaivine yai viha ivi-natuna wayahina deina. ²³ Ka tuta ataina wayahina, itoka avaha Nuana ka-vaniaheī ininika aninigai nihenina. Wayahina, itoka kadu kabebewewa, katoutou ataina a

^a **8:19:** Yaubada ya vevewana tanopi, ka babau, ka wahava, ka wadima, ka wahuma, ka ai deina. Paulo yana ipupu taina vona tana-minikuna deina. Tauna ipuipupu Yaubada ya vevewana habuhabuna vivane tomotau deina, e vevewanaia ai pata nuanuai kadu yai nuanua mamaei tomotau deina. ✧ **8:20:** Nao 3:17-19.

itoava auyewana ininika vovouna kavaniahehi wayahina. Yaubada avaha vi-putu payayeka, ka apaina, auyewana ininika vovouna kavaniahehi wayahina, akanai Yaubada ya paise-wana payayeka nau-yehai.✧ 24-25 Nonova, tutana Yaubada ya vona-dabadaba tanoi ininika vovouna wayahina kanononi, vona ahiahina, kavitumahanei, e kavi-putu yaka nua-vaniaha nui kapotepotei a itoava ininika vovouna kavaniahehi wayahina. Aituhu tomotau avaha aitam aviani ivaniahehi, ka aituhu tau i avaha idudueyei mataia, eha aitam iuna tau nau-wawani yai nua-vaniaha nui ipotepote. Ka itoka eha ininika vovouna kata-vaniahe. Apaina. Wayahina, ataina itoka nau-wawanika katoha-vi-anai kadu nau-wawanika yaka nua-vaniaha nui kapotapota a itoava auyewana ininika vovouna kavaniahehi wayahina.

²⁶ Ka kadu Yaubada Nuana Ahihinata vo-taitaieka yaka ihanua wayahia deina. Iuna eha kat'-anamane medeina kaviama tunuhina. Ka tuta tuta Yaubada Nuana bebebewa na-ivaiteka, ka tauna toutou kadu viana bagibagina wayahika Yaubada matana.

²⁷ Ka Yaubada avaha nuaka anamanei kadu yaka nuanua anamane-yehai, iuna tauna naunau-nene nuaka nihenina. Ka kadu aviani Nuana nuanua, tauna anamane-yehai. Iuna Yaubada Nuana viana itoka Yaubada natunatuna wayahika, ka Nuana ya nuanua ka Yaubada ya nuanua vivane aitamoata.✧

Goyona Kani-tawanei Kana-vane Ahiahina

✧ 8:23: 2Ko 5:2-4. ✧ 8:27: Sam 139:1.

Wayahina

²⁸ Avaha kanamanei Yaubada ya nuanua ahiahina wayahika mamaei, ka kadu tauna honeka iuna ya nuanua nau-iaivana kavaniahei. Wayahina, ataina itoka Yaubada kadune-nuanuaiei, ka tauna dewa aitamoata aitamoata ivin'-omo-nananena wayahikaia paipaisewei itoka yaka vidoha wayahina.✧

²⁹ Iuna Yaubada tupwaka tomotau habuhabui wayahia mai-anamaneka, ka vi-nua-dadaneka, e yawaika na-vo-vinei apaina yawaika tauna Natu-hoina yawaina aitamoata deina. Ika, apaina yaka nuanua tauna Natu-hoina ya nuanua aitamoata deina, ka kadu yaka dewa tauna Natu-hoina yana dewa aitamoata deina. Ka Yaubada ya nuanua itoka tau ekalesia wayahika habuhabuka kavi-yoko aitamoata, Natu-hoina mai-tupuina, kadue tauka habuhabuka taitaina.✧ ³⁰ Nonova Yaubada vi-nua-dadaneka ka ataina tauna honeka, kadu vo-vi-tunutunuhika matana, kadu tauna didigana vo-pataka vivane didigaka.

³¹ Vona ahiahina, memeanina kadueyei Yaubada ya dune-nuanuai aitamoata aitamoata wayahikaia vivane ani-vainena. Wayahina, itoka nau-wawanika kanau-kaiwa Yaubada wayahina ya dewaia wayahina. Yaubada yaka tau vo-taitai kadu tauna yaka tau ito-yavuha kadu aka niam. Wayahina, aituhu tomotau imana-giboeka, o aituhu inau-havieka, taui Yaubada ai havia deina.✧ ³² Iuna Yaubada tauna Natu-hoina eha

✧ **8:28:** Epe 1:11. ✧ **8:29:** Kol 1:18; Ebe 1:6. ✧ **8:31:** Sam 118:6.

ta-nua-tania, kate awaehei kadu vi-nomui itoka wayahika. Yaubada dewei deina, iuna ya nuanua na-vo-vi-tunutunuhika matana. Nau-wawanika tauna ya dewana ananina kanuanuani. Wayahina, memeanina tauna wayahina aituhu aviani habuhabuna kikituna nau-wawanika, akanai tauna ya dewa-haiawa nui veneveneka.³³ Yaubada avaha vi-nua-dadaneka, kadu tauna avaha vo-vi-tunutunuhika matana. Wayahina, aituhu mani tomotau iapa-goyogoyoeke, dewana eha aitam aviani, iuna Yaubada avaha apa-vidovidoheka.[☆] ³⁴ Tomotau iapa-goyogoyoeke aviyaivia? Tai ai wava eha aitam aviani, iuna Tau Ito-yavuha Iesu avaha aniga wayahika, kadu wayahika anigea mini-havine. Tauna yaka Tau Ito-yavuha kadu tauna tomotau aitamoata aitamoata bagibagi-tawanei. Ka Yaubada avaha Iesu awaehei ya vevewana habuhabuna veimeyei. Udu! Tuta tuta Iesu viama wayahika Yaubada matana.

³⁵ Ka Tau Ito-yavuha ya dune-nuanuai wayahika ani-vainena kadu bagibagi-vainena. Tauna ya dune-nuanuai wayahika tomotau aitamaitamoata aitamoata yai bagibagi bagibagi-tawanei. Ka kadu ya dune-nuanuai wayahika dewa habuhabuna bagibagi-tawanei. Eha aitam vita, o inahe, o am navovo, o nagonegonena, o matauta aniga wayahina ana pata Yaubada ya dune-nuanuai wayahika na-bagibagi-tawane.³⁶ Iginuma voneka deina. Nonova me Isiraeli ivona,

[☆] **8:33:** Isa 50:8-9.

“Yaubada, itoai vivane yam yoko.
 Kate tuta tuta mani tomotau
 yai nuanua ina-nau-vi-anigiai.
 Tau i inuanua itoai eha aitam aviani.
 Wayahina, tau i vunuvunuai
 sipiV ivunuvunui aitam tonei wayahina
 deina.”☆

³⁷ Ka avonemi, dewa habuhabuna pai dune aka inahē ivin¹-omo-nananena wayahikaia. Ka Yaubada dune-nuanuaieka, kadu tauna yana ivaita ani-vainena wayahikaia. Wayahina, itoka aka pata inahē aitamoata aitamoata kavane-tawanei.

³⁸⁻³⁹ Udueyei. Yaubada avaha ya dune-nuanuai ani-vainena wayahikaia viwaveneka taina deina. Tauna Natu-hoina Tau Ito-yavuha Iesu yaka Kauvea vi-tunei omo wayahikaia. Ka Yaubada ya dune-nuanuai wayahika aitam manawa kainumu bagibagi-vainena deina, ka eha aitam aviani o eha aitam dewa ana pata manawana na-upwe.

Yaka aniga eha ana pata,
 ka yawaika eha ana pata.
 Eha aitam anelose ana pata,
 ka eha aitam kiniV ana pata.
 Eha aitam aviani mamaei ataina ana pata,
 ka eha aitam aviani omomo
 tuta tepakaia ana pata.
 Eha aitam papani teaka mamae,
 ka eha aitam papani bebegā mamae
 manawana vi-kutakuta.

☆ **8:36:** Sam 44:22.

Iuna manawana ana pata.
Eha aitam aviani Yaubada ya vevewana
nihenina ana pata manawana na-upwe.

Yauke, Paulo, avaha nua-uyana anamane-yehai.
Ana pata deina.

9

Yaubada Ya Tomotau Me Isiraeli Wayahi

¹ Ataina yau ipupu yau yoko me Iudea wayahi anau-yehai. Yauke Tau Ito-yavuha nihenina amamaei, ka tauna yau ipupu taina nononi. Wayahina, aviani avonemi, akanai vonana vivane vona tunutunuhina, eha vitupu. Yauke au ayaunena nihenina anamane-yehai vona taina vona tunutunuhina, ka kadu Yaubada Nuana awaehei aitamoata deina. ² Avi tuta yau yoko me Isiraeli anuanuani, nuau ivita ananina wayahi. Iuna ataina tau Iesu ivihahaiei. ³ Aituhu au pata yauke yau dewa wayahi yai vitumahana Iesu wayahina anau-vevewane, akanai yauke yau viama vivane Yaubada na-bwanatau, e Iesu avo-haini tau yai vidoha wayahina. Iuna tau me Isiraeli vavaneiu, ka tau adune-nuanuaiei. (Kate Yaubada eha ya nuanua viamana deina n^l-awaehe.)[✧]

⁴ Ka vona ahiahina, nonova Yaubada me Isiraeli vi-nua-dadanei, e payayei, tau natunatuna. Tutana tauna eta-naoi papani Egipita ini-tawanei, tau didigana idudueyei, ka tauna didigana vo-patai idudueyei etawana tunina tunina wayahia. Ka kadu tauna ya

[✧] 9:3: NiT 32:32.

veimea venei, ka viwavenei medeina itapanono tunuhina. Ka tauna vona-dabadaba ahiahina venevene kadu dewa ahiahina apa-taputapuei wayahi, e nau-wawani tuta tepaia ivaniahei.✠

⁵ Ka ataina itoai me Isiraeli atupua-nenenehi yama tupua-nenenehi ai wava anani wayahia, ka kadu Tau Ito-yavuha ya tupua ininina vin'-omo yama tupua-nenenehi aitamoata deina. Wayahina, ataina me Isiraeli kadu Iesu dede aitamoata inini nihenina. Ataina Iesu dewa habuhabuna veimeyei. Wayahina, nau-wawanika Yaubada kan'-awa-davedavei tuta eha a itoava wayahina! Ana pata deina.

⁶ Yaubada tauna ya vona-dabadaba me Isiraeli venei tau'i yana yoko. Kadu tauna vona-dabadaba wayahina apa-taputapuei apaina aitam Tau Ito-yavuha vi-tunei na-omo wayahia. Yaubada yana dewa kadu ya vona-dabadabana aitamoata. Kate me Isiraeli tupwai Yaubada ya vonana eha ita-vitumahane. Wayahina, kadueyei. Aka pata me Isiraeli katana-vewani yoko ainua wayahia. Aituhu aviyaivia inini dayahi Abaraham ininina dayahina aitamoata, akanai kana-vona tau'i me Isiraeli ininiata. Ka aituhu aviyaivia yai vitumahana Abaraham ya vitumahana aitamoata deina, akanai kana-vona tau'i me Isiraeli ininia kadu tau'i me Isiraeli yai vitumahana wayahina.

⁷ Udu. Me Isiraeli habuhabui me Isiraeli ininia, ka tupwai me Isiraeli yai vitumahana mamaei, kate tupwai eha. Unuani. Yaubada Abaraham vonei, ivona,

✠ **9:4:** NiT 4:22; Ebe 9:5; Sam 147:19; Lev 1–10; Rom 15:8.

“Yauke avona-dabadaba wayahima
yam tupua-nenenehi avenem.

Kate yam tupua-nenenehi ivin'-omo
natum Isaki ana heta wayahina.

Eha mani natum wayahina ivin'-omo.”☆

⁸ Tuta munia wayahina, Abaraham natunatuna habuhabui imamaei, eha Isaki ana heta. Kate Yaubada ya vonana Abaraham wayahina an' anamana taina. Natunatuna habuhabui ininina wayahina eha natunatu-hoina. Abaraham natunatu-hoina vivane tau ai heta ivin'-omo Yaubada ya vona-dabadabana wayahina.☆ ⁹ Ka Yaubada ya vona-dabadabana Abaraham wayahina taina,

“Aitam tuta avaha avi-nua-dadani,
ka auyewana wayahina amavina wayahima,
e awam Sara vi-natuna onotona.”☆

¹⁰ Ka kadu aitam pai dune deina avenemi wami Isaki wayahina. Isaki me Isiraeli habuhabuka waka. Ka tutana awana ana wava Rebeka amwanainahe, madina natu-yuayua. ¹¹⁻¹² Ka Yaubada Rebeka vonei, ivona,

“Apaina mai-tupuina vi-tau paisewa
nepena wayahina.”

Naona Yaubada yan' apa-taputapu-nana vin'-omo, e munia Rebeka vi-natuna. Wayahina, kadueyei Yaubada yan' apa-taputapu-nana an' anamana eha ta-vin'-omo Rebeka natunatui

☆ 9:7: Nao 21:12. ☆ 9:8: Gal 4:23. ☆ 9:9: Nao 18:14.

natu-yuayua yai dewa wayahina. Iuna tutana apa-taputapu-nana vin'-omo, vona ahiahina, tau yai tupua eha. Apaina itupua. Wayahina, kana-vona natunatui natu-yuayuaia eha yai dewa ahiahina, kadu eha yai dewa goyona. Kate Yaubada ya nuanua naona mamaei, e naona tauna vi-nua-dadani deina.✧

¹³ Ka kadu aitam mataina Iginuma nihenina voneka vivane Yaubada ya ipupuna deina, ivona,

“Yauke Iakobo adune-nuanuaiei,
kate Esau atana-wavinei.”✧

¹⁴ Yaubada ya vonana medeina? Kaiwadi, nau-wawanika kana-vona Yaubada yana dewa Esau wayahina eha tunutunuhina? Eha-ohota.
¹⁵ Unuani, Yaubada kadu Mosese vo-vi-mahetei, ivona,

“Tupwai tomotau avi-nua-dadanei,
e tau wayahi yau ate-nuanuai aveneveinei.

Ka tupwai tomotau avi-nua-dadanei,
e tau wayahi yau dune-nuanuai aveneveinei.”✧

¹⁶ Vonana wayahina kan'-anamanei tomotau eha ai pata Yaubada yan' ate-nuanuai o tauna ya dune-nuanuai ivaniahe iuna tau yai nuanua ananina mamaei ivaniahei deina. Ka kadu eha ivaniahe tau yai paisewa ai nau-pata wayahina. Eha-ohota! Tomotau ai pata

✧ **9:11-12:** Nao 25:23. ✧ **9:13:** Mal 1:2-3. ✧ **9:15:** NiT 33:19.

Yaubada yan' ate-nuanuai ivaniahe'i iuna tauna vi-nua-dadanei, ivaniahe'i deina.✠

17 Nonova, tutana Yaubada me Isira'eli eta-naoi papani Egipita ini-tawanei, tauna ipupu me Egipita yai kiniV, ivi-wahani ParaoV, wayahina deina. Ivona,

“Yauke wamke am wawa asi-nai
evi-kiniV me Egipita wayahia.

Ka yau dewana iuna mamaei.

Yauke yau nuanua tomotau habuhabui
aviwaveni in'-anamane-vidoha
yauke wamke abagibagi-tawanem.

E munia au anamana na-nata
tomotau yai ipupu wayahina,
e tau ma' tanopi habuhabui in'-anamaneu
yauke taua koiaka.”✠

18 Wayahina, vona ahiahina, aituhu Yaubada tupwai tomotau vi-nua-dadanei yan' ate-nuanuai veneveni, akanai tauna venei deina. Ka kadu aituhu Yaubada mani tomotau vi-nua-dadanei tauna ununui vo-vi-toyoo, e tau'i vatui, akanai tauna vo-vi-toyoo, e tau'i vatui deina.

19 Kaiwadi, dewana wayahina tupwami wayahia uvonavona deina, “Aituhu itoka tomotau yaka dewa habuhabuna ivin'-omo Yaubada ya nuenua, aviani wayahina Yaubada dewa-yaiyaieka? Itoka tauna ya nuanua kadedewei, iuna tauna bagibagi-vainena, ka itoka eha. Wayahina, aituhu itoka tomotau tauna ya nuanua kadedewei deina, aviani iuna

✠ 9:16: Epe 2:8. ✠ 9:17: NiT 9:16.

tauna dewa-yaiyaieka yaka dewa wayahina? Ya dewana eha tunuhina.”²⁰ Yaiiau, itoka aka wava aviani? Eha nau-wawanika Yaubada yana ipupu kanau-pate. Udu! Iginuma nihenina ivona deina,

“Medeina? Aituhu aitam gugua
tauna a tau ai-tai wayahina vi-heyoheyo,
dewana ahiahina o kadi goyona?

Udu. Aituhu aitam gugua
tauna a tau ai-tai vi-tanatanaiei, ivona,
‘Aviani wayahina enau-vevewaneu deina?’
vi-tanai taina a vin^l-omana eha ahiahina.”[☆]

²¹ Kadu aitam pai dune taina. Tau voa kunia tauna ana heta ya paisewa veimeyei, e tauna ana heta vi-nua-dadani medeina ya motopuna a tana-vewana. Aituhu tauna ya nuanua motopuna tupwana tevani, e mai-nuana kunia ana dune ahiahina voei kaikaiwabo wayahina, akanai deina. O aituhu tauna ya nuanua motopuna tupwana tevani, e vo-kwayavonina kunia voei payapayaya wayahina, akanai deina.[☆]

²² Yaubada ya paisewa deinake. Tauna ya nuanua tomotau in^l-anamanei tauna bagibagi-vainena. Kadu tauna ya nuanua tomotau in^l-anamanei tauna magana bawei dewa goyona wayahina. Tauna ana pata vo-kwayavonina a havia habuhabui na-vita-vovoni. Kate eha ta-dewe deina. Tauna potapota mamanaina. Udu. Taui a havia aitam kunia deina, ka tauna vo-vi-aiiaei vita-vovona wayahina.

[☆] **9:20:** Isa 29:16; 45:9. [☆] **9:21:** Ier 18:6.

23-24 Vona ahiahina, tauna potapota mamananina. Ka yana dewa aitam pai dune tau vitumahana wayahi. Tau vitumahana kunia tunina deina, ka tauna vo-vi-aiaiei vivane didigana na-vo-patai. Wayahina, yan! ate-nuanuai tau vitumahana wayahi kadueyei. Udu! Tau vitumahana vivane itoka tau ekalesia. Ka tauna honeka, e kavitumahanei. Ka kadu kanamanei tau vitumahana tupwaka me Iudea kadu tupwaka eha me Iudea.

25 Nonova Yaubada kadu dewana apa-taputapuei. Osea ya iginuma nihenina ivona deina,

“Ataina tau i eha me Iudea eha yau yoko,
 kate apaina avi-wahani ‘yau yoko.’
 Ataina eha adune-nuanuaie,
 kate apaina avi-wahani
 ‘tau adune-nuanuaiei’.”✧

26 Yaubada kadu ivona,

“Nonova tau avonei,
 ‘Itomi eha yau yoko.’
 Kate apaina, papani-nana wayahina, avonei,
 ‘Itomi Yaubada Ama!-vavaha natunatu’.”✧

27 Ka tau apa-taputapu ana wava Isaia tauna na nua-vitana apa-taputapuei deina, ivona,

“Ataina me Isiraeli yoko ananina,
 ai yau magama tania deina.
 Kate apaina tau i yoko kikituna,

✧ 9:25: Ose 2:23. ✧ 9:26: Ose 1:10.

iuna Yaubada wayahia
aitonuata ai heta na-ito-yavuhi.✧

28 Iuna nonova Yaubada apa-taputapu apaina
tau goyogoyona aitamoata aitamoata
na-dewa-yaiyaiei.

Kadu auyewana tepakaia yana dewa
vo-kwayavoni vin'-omo tauna
yan' apa-taputapu wayahina deina.

Ka auyewana wayahina eha aitam yai etawana
ina-novo-tawane.”

29 Kadue Isaia ivona deina,

“Itoka me Isiraeli nau-wawanika
yaka Yaubada na-dewa-yaiyaieka,
tauna me Sodom kadu me Gomora
dewa-yaiyaiei aitamoata deina.

Yaubada Tau Bagibagi-vavaha
tomotau vita-vovoni-yehai.

Kate aituhu eha yan' am-venena
awawaehina wayahikaia,
nonova habuhabuka me Isiraeli
iakwa.

Kate tauna yan' am-venena
awawaehina veneka.

Wayahina, ataina itoka kamamaei,
ka apaina yaka tupua-nenenehi
ivin'-omo imamaei.”✧

30 Wayahina, medeina kana-vona? Aituhu
itoka me Iudea yaka yoko kadu tau eha
me Iudea yai yoko kabou-viwavei, aviani
kan'-anamanei? Vona ahiahina, nonova tau

✧ 9:27: Isa 10:22-23. ✧ 9:29: Isa 1:9.

eha me Iudea eha ita-naunau-nene aitam etawana wayahina ividoha Yaubada matana. Tau i eha etawanana ita-naunau-nene, kate udu! Tau avaha ivaniahei! Etawanana vivane Yaubada ivitumahanei. ³¹ Kate nonova a itoava tuta ataina wayahina, me Isiraeli etawana wayahina inaunau-nene ividoha Yaubada matana. Kate tau i eha ita-vaniahe. ³² Tau i inaunau-nene-wayohe. Iuna tau i inaunau-nene aitam veimea wayahina. Tau i inuanua aituhu veimeana idedewei, ividoha Yaubada matana deina. Eha ita-naunau-nene medeina ividoha vitumahana wayahina. Wayahina, tau i avaha hanu pai vito-painena wayahina ivito-paineni.✧
³³ Iuna Iginuma nihenina Yaubada ivona deina,

“Udu! Apaina aitam hanu pai vito-painena aboui papani Sioni V nihenina, ka tomotau habuhabui ivito-paine ipeu, iuna hanuna. Kate aituhu aviyaivia tauna ivitumahanei, tau i ividoha akanai. Ka eha aitam tuta tau i ina-ini-yauyau mataua.”✧

10

¹ Vavaneiu, yauke yau nuanua ananina yau yoko me Isiraeli inua-vinana, ka Yaubada ana pata na-ito-yavuhi. Ka tuta habuhabuna wayahina Yaubada aviamei tauna na-ivaitei ito-yavuha ivaniahei deina. ² Yauke tomotau i avaha anamanei ivitapewa ananina Yaubada ivo-vi-dewa-haiawi yai dewa wayahina, kate tau i

✧ 9:32: Isa 8:14. ✧ 9:33: Isa 28:16; 1Pi 2:6.

mwagemwagei. Wayahina, tau i yai paisewa eha aitam aviani ahiahina tauna matana. ³ Yaubada vane Iesu wayahina vi-tunei omo wayahikaia. Ka vaneana voneka medeina kavidoha Yaubada matana. Kate tutana vaneana omo wayahia, tau eha ita-vitumahane. Tau i inuanua kadu aitam etawana mamaei, ka etawanana wayahina ividoha Yaubada matana. Wayahina, inaunau-nene etawanana wayahina. Tau i eha Yaubada movina ita-nononi, kadu eha ya nuanua ita-vi-ateteye, kadu eha movina ita-vi-ateteye. Tau i yai nuanua idedewei. ⁴ Ataina tuta Yaubada ya nuanua kavidoha matana etawana vovouna wayahina. Tauna avaha etawana tutuaina bou-potei iakwa. Wayahina, ataina tuta eha aitam koiaka ana pata tauna Yaubada ya veimea vi-ateteye, e munia Yaubada n'-awaehe tauna tau tunutunuhina matana deina. Eha ana pata. Ataina tuta etawana aitamoata ana heta mamaei kavi-tau tunutunuhika, vivane Tau Ito-yavuha Iesu kavitumahanei.

⁵ Etawana tutuaina taina deina. Aituhu veimea kavi-ateteyei, akanai, kavi-tau tunutunuhika. Ka Mosese etawana tutuaina wayahina ipupu deina, ivona,

“Aituhu aviyaivia veimeana
aitamoata aitamoata ivi-ateteyei tunuhina,
akanai tau i mamaei ahiahina deina.”

Yaubada movina ivona deina, kate itoka to-motau eha aka pata, iuna tuta tuta veimeana katana-bwegebwegei.*

* **10:5:** Lev 18:5.

⁶ Kate etawana vovouna vivane yaka vitumahana wayahina kavi-tau tunutunuhika. Ka etawanana wayahina ivona,

“Eha nau-wawanim bana mamanaina evanevane wahuma etawana wayahina enaunau-nene evaniahe. Eha.✧

⁷ Ka kadu eha nau-wawanim bana mamanaina eopuopu ito-niuna etawana wayahina enaunau-nene evaniahe.”

Eha nau-wawanika kavanevane wahuma Iesu kataini na-opu tanopia kavidoha deina. Ka kadu eha nau-wawanika kaopuopu ito-niuna Iesu kataini na-vane tanopia kavidoha deina. Dewa ainuai vivane dewa-wayohe.

⁸ Ka tauna yaka etawana vovouna viwaveneka deina, ivona,

“Vane etawana wayahina maupwani-hoima, vivane nihenima, kadu avaha awam nihenina kadu nuam nihenina.”

Vaneana vivane vitumahana Iesu wayahina. Kadu ataina tuta vaneana anaunau-waheyeyi tomotau habuhabui wayahia papani aitamoata aitamoata wayahia. Ka vaneana anaunau-waheyeyi taina.

⁹ Vona tunutunuhina, Iesu Tau Ito-yavuha aniga, kadu munia Yaubada anigea si-vi-mini-havinei. Ka aituhu aviyaivia vaneana ivitumahanej, kadu aituhu ivona,

✧ **10:6:** VV 30:12-14.

“Iesu vivane Kauvea-hoina a heta-ohota,” akanai Kauvea na-ito-yavuhi. ¹⁰ Ka dewa taina ainua nau-wawanika kadewei. Naona nau-wawanika nuaka nihenina Iesu Vaneana kavitumahanei. Aituhu kadewei deina, Yaubada awaeheka kavi-tau tunutunuhika. Ka kadu nau-wawanika awakaia kawaehei, kana-vona, “Iesu Tau Ito-yavuha Kauvea-hoina.” Ka aituhu kadewei deina, Yaubada yaka vona na-nononi ka na-ito-yavuhika. ¹¹ Avaha iginuma aitam atomani unononi,

“Kate aituhu aviyaivia tauna ivitumahanei,
 tau ividoha akanai.
 Ka eha aitam tuta
 tau ina-ini-yauyau mataua.”✧

¹² Wayahina, taina deina kadueyei. Tai me Iudea kadu tau eha me Iudea yoko aitamoata deina. Iuna Iesu me Iudea yai Kauvea, kadu tauna tau eha me Iudea yai Kauvea. Aituhu aviyaivia me Iudea wayahia iviama Kauvea wayahina, tauna na-nononi, e tau yai viama na-nau-patai dewa ahiahina wayahina. Kadue aituhu aviyaivia tau eha me Iudea wayahia Kauvea wayahina iviama, tauna na-nononi, e tau yai viama na-nau-patai dewa ahiahina wayahina aitamoata deina.✧ ¹³ Ka Iginuma voneka deina, ivona,

“Aituhu aviyaivia iviama Kauvea wayahina,
 tauna yai viama aitamoata aitamoata
 nononi,

✧ **10:11:** Isa 28:16. ✧ **10:12:** Dew 15:9.

kadu na-ito-yavuhi.”✧

14-15 Yaubada ya nuanua tauna tomotau na-ito-yavuhi. Wayahina, tauna yana dewa taina deina. Naona tauna ya tau nau-wahe vaniahei, e vane mataedai. Iakwa, e tauna vi-tunei iomo mani tomotau wayahia. Ka tau nau-wahe-naia vaneana inaunau-wahei, ka tomotau inononi. Iakwa, tomotau vaneana ivitumahanei, e ivi-putu iviama Kauvea wayahina na-ito-yavuhi. Ka Yaubada awaehi itoka yaka ito-yavuha kavaniahei deina, ka ya dewana kavaniahei Iginuma nihenina, ivona,

“Tutana Yaubada ya tau nau-wahe
iomo wayahikaia,

dewana ahihi-vainena wayahika.

Iuna taui Vaneana Ahiahina
inaunau-waheyeyi, kanononi.”✧

16 Tupwai tomotau Yaubada inau-kaiwei deina, kate eha habuhabui. Me Isiraeli habuhabui Vaneana Ahiahina ivihahaiei.^a Tutana Isaia nau-nau-wahe, dewana vin^l-omo deina, ivona,

“Kauvea, ai vi-am tomotau
yaka mataeda ivitumahane?
Aitonuata. Eha habuhabui.”✧

✧ **10:13:** Ioe 2:32. ✧ **10:14-15:** Isa 52:7. ^a **10:16:** Vaneana Ahiahina aitam vona baimina Iesu viviwavina wayahina.

✧ **10:16:** Isa 53:1.

17 Wayahina, kadueyei, tau nau-wahe nau-wawani Vaneana Ahiahina inau-nau-waheyei. Ka avi tuta tomotau Tau Ito-yavuha-nana vaneana inononi, tau nau-wawani ivi-nua-dadana. Ka tau ai heta vaneana ivitumahanei o kadi ivihahaiei. 18 Ka Yaubada avaha ya tau nau-wahe vi-tunei iomo papani aitamoata aitamoata wayahia. Ka Iginuma voneka deina, ivona,

“Yaubada ya tau nau-wahe avaha iomo papani aitamoata aitamoata wayahia, ka tomotau habuhabui avaha nau-wahe-nana inononi.”✠

19 Vavaneiu, vonana tunuhina. Ka aviani wayahina me Isiraeli Yaubada movina ivihahaiei? Nonova Yaubada Mosese vonei, tauna ya nuanua me Isiraeli yoko wayahi tuta tepaia vo-vi-mahetei, ivona,

“Apaina paisewa ananina kadu ahiahina apaisewei mani tomotau wayahi. Ataina tuta tomotau eha yau yoko. Kate apaina, avi tuta itomi me Isiraeli yau paisewa tau wayahi ududueyei, uvi-bwanou wayahina. Ika, ataina tomotau eha it'-anamanau, kate apaina, avi tuta yau paisewa ahiahina wayahi ududueyei, itomi unua-goyoei.”✠

✠ 10:18: Sam 19:4. ✠ 10:19: VV 32:21.

20 Ponimana habuhabuna apa-taputapu-nana munia, Yaubada Isaia vonei dewana wayahina, e Isaia ginumi, ivona,

“Tau! mwagemwagei eha ita-naunau-nene wayahiu,
kate udu! Tau! avaha ivaniahau.
Tau! eha ita-viama wayahiu,
kate tau! wayahia aviwaveneu,
in'-anamanau.”✧

21 Yaubada tauna ya paisewa apa-taputapuei tau! eha me Isiraeli wayahi deina. Kate tauna ya tomotau me Isiraeli wayahi ivona deina,

“Tuta tuta, nonova a itoava tuta ataina wayahina,
ahidahida yau tomotau wayahia
moviu inononi,
kate eha yai nuanua.
Tuta tuta wayahiu! ivi-heyoheyo,
ka eha ita-vi-ateteyeu.”✧

11

1 Wayahina, medeina kana-vona? Ataina me Isiraeli tupwai inuanua yai Yaubada avaha viha-haiei. Kate eha. Nuanua taina eha tunuhina. Iuna yauke kadu me Isiraeli aitam, ka vona ahiahina, Yaubada awaeheu yauke natuna. Unononi. Abaraham vivane wanohiu, ka kadu yau dede ana wava Beniamina, tauna Abaraham itena aitam.✧ 2 Yaubada eha tauna ya tomotau ta-nua-panie. Nonova Yaubada me

✧ 10:20: Isa 65:1. ✧ 10:21: Isa 65:2. ✧ 11:1: 1Sa 12:22; Sam 94:14; Pili 3:5.

Isiraeli vi-nua-dadanei yana yoko. Kaiwadi it-omi medeina? Tau apa-taputapu ana wava Elidia viviwavina unuani o eha? Viviwavina viwaveneka Yaubada ya tomotau habuhabui tau goyogoyoi, kate Yaubada eha ta-vihahaie. Elidia Yaubada wayahina nau-vonuvonu tomotau goyogoyoi wayahi, ivona,

³ “Kauvea, tomotau goyogoyoi taina avaha yam tau apa-taputapu aitamoata aitamoata inau-vi-anigi, kadu tau avaha yam pai vi-nomu ivita-vovoni. Ataina tuta yauke au heta-ohota onoto ahiahiu amamaei, ka tau yai nuanua kadu taua ina-nau-vi-anigiu.”☆

⁴ Ka Yaubada vona-nau-patei, ivona,

“Eha vivane am heta emamaei. Ataina tuta ononotoi ahiahi ai yau 7000 avi-nua-dadanei imamaei, ka tau eha yaubada vitupu ana wava Baala wayahina ita-iwaodu, kate taua iawa-davedaveu tunutunuhina. Kate wamke eha ononotoia et'-anamane.”☆

⁵ Nonova dewana vin'-omo, kadu ataina vin'-omo aitamoata deina. Ataina tuta Yaubada avaha me ludea tupwai vi-nua-dadanei yan' am-venena awawaehina ivaniahei. ⁶ Unononi. Aituhu Yaubada tauna yan' am-venena awawaehina nui vi-nua-dadanei na-ito-yavuhi, kan'-anamanei

☆ **11:3:** 1Ki 19:10, 14. ☆ **11:4:** 1Ki 19:18.

eha Yaubada ya nuanua naona tomotau ya veimea ivi-ateteye tunuhina, e munia na-ito-yavuhi. Aituhu deina, yan' am-venena awawaehina aviani?☆ 7 Kate aviani vin'-omoi? Nonova a itoava tuta ataina wayahina, me Isiraeli habuhabui ipaipaisewa kadu ibebebewa iuna yai nuanua Yaubada yai paisewa toyoina dudueyei, e ivo-vi-dewa-haiawi deina, e munia ivi-tau tunutunuhi tauna matana deina. Kate tau ipaipaisewa-wayohe. Iuna Yaubada tupwai tomotau vi-nua-dadanei, e tauna tau ai heta ito-yavuhi iakwa. Kate mani tomotau, tau Yaubada eha ta-vi-nua-dadane, tau habuhabui ununui vo-vi-toyoa. 8 Nonova Mosese ginuma tomotau wayahi, ivona,

“Yaubada dewaia dewei ka ya nuanua tomotau yai vo-vi-tupatupai.

Wayahina, nuai igoyo, ka eha ai pata nua-uya in'-epe ahiahina.

Kadu idunedune mataia,
ka inonononi tanihaia,
kate eha it'-anamane-vidoha.

Yaubada dewaia dewei,
kate nonova a itoava tuta ataina wayahina
tau mwagemwagei imamaei aitamoata
deina.”☆

9 Ka munia Davida me Isiraeli yai awa-dava awakabina dueyei, ka tauna nua-vita wayahina, e bwanatai ya viana Yaubada wayahina, ivona,

☆ 11:6: Gal 3:18. ☆ 11:8: V.V 29:4; Isa 29:10.

“Yaubada, wamke avaha tomotau
aniani ahiahina evenei.

Kate yau viama evi-onei
tonei taina wayahia.

Ka kadu aviamem tau i yai tonei
ivi-pai vito-paine tau wayahi.✧

¹⁰ Kadu yauke aviamem eawaehei
matai vi-novanei, e tau eha ai pata
idunedune ahiahina deina.

Kadu aviamem yai vita evo-vi-natei,
e tuta tuta tau upui viviha.”

¹¹ Avaha avonemi, me Isiraeli habuhabui
ivito-painei kate eha ita-peu-vavaha. Ka
medeina? Dewana vivane Yaubada ya nuanua
tau wayahi? Eha-ohota. Tau ipeu, kate aviani
vin'-omo peu-nana wayahina? Vona ahiahina,
tutana tau ipeu, Yaubada itomi eha me Isiraeli
ito-yavuhimi. Yami ito-yavuha vin'-omo nonova
Yaubada apa-taputapuei aitamoata deina. Ka
Yaubada ya nuanua avi tuta me Isiraeli yami
ito-yavuha idudueyei, e ito-yavuha nuai n'-epei, e
tau ivi-bwanouemi, e ivi-putu nuanuai Yaubada
na-ito-yavuhi.✧

¹² Me Iudea yai Yaubada ivihahaiei, ka yai
dewana dewa goyona. Kate udu! Ataina itomi
eha me Iudea avaha Yaubada natunatuna.
Tau me Iudea yai Yaubada ivihahaiei, ka
taumi ito-yavuha uvaniahei deina. Wayahina,
kana-vona aitam dewa ahiahina vin'-omo
tau yai dewa goyona wayahina. Wayahina,
aituhu me Iudea inua-vinana kadu aituhu tau

✧ **11:9:** Sam 69:22-23. ✧ **11:11:** Dew 13:46.

Yaubada movina inononi, apaina dewa ahiahina habuhabuna vin'-omo habuhabuka wayahikaia.

¹³ Yaubada vi-tuneu aomo itomi eha me Iudea wayahimia. Ka anaunau-wahemi kadu avi-wavenemi, ka tuta tuta yau paisewa wayahimi toyoina. Ka yauke yau nuanua yau paisewa Yaubada wayahina avo-vi-tupanei. ¹⁴ Wayahina, apaipaisewa toyoina wayahimi akanai. Ka aituhu yau tomotau me Iudea yami vidoha idudueyei, ka aituhu ivi-putu ivi-bwanouemi, kaiwadi, apaina kadu tau i inua-vinana, e ivi-putu yau nau-wahe inononi, ivitumahanei, ka Yaubada kadu tau na-ito-yavuhi. Aituhu dewaia ivin'-omo deina, akanai adewa-haiawa ananina.

¹⁵ Vona ahiahina, tutana me Iudea Yaubada ivihahaiei, yai dewana wayahina tau i inusi nuai nihenina deina. Ka Yaubada itomi eha me Iudea ito-yavuhimi. Ka kadu aituhu me Iudea inua-vinana, ka aituhu imavina Yaubada wayahina yawai-vavaha ivaniahei, akanai dewana a venavenau vivane tau i anigea imini-havine deina. ¹⁶ Vona-tana-minikuna ainua avonemi, e vonana pouna un'-anamanei.

Vona-tana-minikuna naona taina. Yaubada me Isiraeli veimeyei nau-wawani ai aniani naona iam-veneneyei tauna wayahina. Ka avi aniani Yaubada ivenevenei deina vivane ahihinata. Ka aituhu tau i ivi-putu palaua inau-vevewanei, ka aituhu palauana a pai vi-putu bigana itana-vewani, e tupwana iam-veneneyei Yaubada wayahina deina, vona ahiahina, munia palauana habuhabuna pai vi-putu-nana bigana wayahina vin'-omo vivane ahihinata aitamoata deina.

Vona-tana-minikuna v¹-inuana taina. Abaraham vivane Yaubada yana onoto kadu tauna tau apa-taputapu aitam. Wayahina, tomotau ataina Abaraham dayahina wayahina itupua, tau kadu Yaubada ya tomotau aitamoata deina. Udu. Abaraham aitam ai ana wava olive^V wanohina deina, ka yana dede ai-nana nahanahana deina. Aituhu Yaubada wetona ahihinata wanohina venei taitaina nihenina, vona ahiahina, wetonana kadu taitaina nahanahana nihenia, ka avi uana vin¹-omo wetonana wayahina vivane ahihinata aitamoata deina.

¹⁷ Vona ahiahina, me Isiraeli tupwai eha Yaubada ita-vitumahane. Wayahina, tauna ai olive-nana^V wayahina paipai. Ka Yaubada taumi epami, e ai-nana ahiahina dobwana wayahina tubomi. Itomi yami tupua vivane ai udaudana wayahina, kate ataina wetona ahihinata vanevane wanohina wayahina, e taitaina nihenimia.[☆]

¹⁸⁻¹⁹ Kate taumi eha me Iudea nau-wawanimi udune-vivinihi ahiahina. Eha nau-wawanimi unua-vane o uvona-vanevane deina, “Itoka tomotau ahiahika, kate tomotau me Iudea goyogoyoi. Wayahina, Yaubada tau paipai, e tauka tuboka kama¹-vavaha tau ai pai vi-ai nihenina.” Vonana vona-kavokavovo. Ataina itomi yawaimi vanevane ai wanohina wayahina. Itomi eha ai-nana wanohina uta-ivaite. Eha. Ai-nana wanohina ivaitemi. Nau-wawanimi unuani deina. ²⁰ Vona ahiahina, Yaubada tomotau paipai iuna ataina tau eha yai vitumahana. Ka tauna ai-nana dobwana wayahina tubomi, iuna ataina yami vitumahana mamaei. Wayahina, eha

[☆] **11:17:** Epe 2:11-19.

nau-wawanimi unua-vane o uvona-vanevane dewana wayahina. Itomi nau-wawanimi Yaubada umatamatautei. ²¹ Akanai umatamatauta, iuna tutana me Isiraeli Yaubada ivihahaiei, tauna paipai akanai. Wayahina, udune-vivinimi ahiahina. Iuna ataina itomi Yaubada uvitumahanei, kate apaina, aituhu uva-hamwahamwana, tauna kadu taumi na-paipaimi aitamoata deina akanai.

²² Yaubada ya dewaia ainua kadueyei, vivane tauna yana dewa bigana tomotau wayahia, ka kadu yana dewa manimaninina tomotau wayahia. Tomotau iva-hamwahamwana ipeu, e tauna manimaninina wayahia, kate taumi eha me Iudea dewa bigana uvaniahei tauna wayahina. Wayahina, itomi nau-wawanimi tuta tuta tauna uvitumahanei kadu yana dewa bigana wayahimi unuanuani. Iuna aituhu eha udedewe deina, apaina tauna kadu na-paipaimi.✧

²³ Unononi. Aituhu me Iudea inua-vinana, ka aituhu ivi-putu ivitumahana-havinei, apaina Yaubada na-tubo-havinei, iuna Yaubada ana pata dewana wayahina. ²⁴ Yaubada ya nuanua tauna itomi eha me Iudea upwami ai oliveV udau-dana wayahina, e tubomi ai oliveV ahiahina wayahina ya baguna nihenina. Tuta tuta tauna ai olive-nanaV dune-vi-avini ahiahina. Yaubada yana dewa deina, iuna ya nuanua wetonana ahihinata taitaina nihenimia. Kadu unuani. Tauna ya nuanua ananina ya tomotau me Iudea wayahi wetonana ahihinata taitaina nihenia, iuna tau i mai-tabo ai-nana nihenina. Ka memeanina Yaubada wayahina na-tubo-havinei. Vona ahi-

✧ **11:22:** Ioni 15:2, 4.

ahina, Yaubada ya nuanua ananina me Iudea wayahi ivitumahanei.

²⁵ Yaiau, nuanuau aitam dewa hivahivana me Isiraeli wayahi amataedami, ka aituhu nua-uya taina un'-anamanei, apaina eha unua-vane. Nonova Yaubada avaha anamanei ataina yana yoko me Isiraeli ivihahaiei. Wayahina, tauna aitam dewa vo-vi-aiaia tau i yai vidoha wayahina. Ka dewana taina. Tauna vi-nua-dadana, e un-unui vo-vi-toyoo, ka eha ai pata ivitumahane. Unuani. (Nonova Yaubada dewei deina me Egipta yai kiniV ana wava ParaoV wayahina.) Ka Yaubada ya nuanua tauna taumi eha me Iudea vi-putu na-ito-yavuhimi. Ka habuhabumi yami ito-yavuha na-iakwa, e tauna tau i me Iudea wayahia vi-nua-dadanei, e na-ito-yavuhi-neiei.

²⁶ Wayahina, kadueyei Yaubada avaha me Isiraeli habuhabui vi-nua-dadanei, na-ito-yavuhi. Yaubada apa-taputapuei Isaia wayahina deina, ivona,

“Apaina Tau Ito-yavuha
papani Sioni wayahina vin'-omo,
ka tauna yaubada vitupu vo-tahoi
Iakobo yana dede wayahia.*

²⁷ Yauke tau i nui awaehei aitamoata deina,
auyewana tepakaia wayahina
yai goyona an'-epa-yavunei.”*

²⁸ Yauke Vaneana Ahiahina anaunau-waheyei,
ka ataina me Iudea vivane Vaneana Ahiahina
a havia. Wayahina, tau i itomi ami havia deina.

* **11:26:** Isa 59:20-21. * **11:27:** Ier 31:33-34.

Kate unuani! Nonova Yaubada vona-dabadaba Abaraham wayahina tauna yana dede wayahi. Wayahina, kadueyei Yaubada me Iudea dune-nuanuaiei, kadu vi-nua-dadanei, ka ya nuanua na-ito-yavuhi.

²⁹ Avi am-venena-kavovo tauna veneveni, eha yana dewa n'-epa-havine. Ka kadu deina, avi tomotau tauna honehinei in'-omo wayahina, eha yana dewa tuta munia tomotau vihahaiei.

³⁰ Ataina me Iudea eha Yaubada ita-vi-ateteye. Kate udu. Nonova itomi yami dewa aita-moata deina. Iuna nonova itomi eha Yaubada uta-vi-ateteye. Kate Yaubada dune-nuanuaiemi, ka tutana tau i Yaubada ivihahaiei, tauna ya paisewa wayahimi vi-putui. ³¹ Wayahina, ataina tau yami vidoha Yaubada wayahina idudueyei, ka ivi-bwanouemi kadu Yaubada ivihahaiei. Kate apaina, tau kadu Yaubada ya dune-nuanuai ivaniahei. ³² Yaubada avaha awaehei tau i me Iudea kadu taumi eha me Iudea tauna ya veimea katana-bwegebwegei kadu kavihahaiei. Iuna tauna ya nuanua habuhabuka nau-wawanika ate-nuanuai aitamoata kavaniahei tauna wayahina, e tauna nua-piahika aita-moata deina.

Paulo Yaubada Apa-vidovidohei

³³ Yaubada ya nua-uya ani-vainena vivane ito-niuna,
 kadu yan' am-venena awawaehina
 ahihi-vainena.
 Tauna ya nua-uya itoka tomotau yaka nua-uya
 bagibagi-tawanei,
 ka itoka tomotau eha aka pata tauna ya nuanua
 kan'-anamane-vidoha,

kadu eha aka pata tauna yana dewa
a venavenau kan'-anamane.✧

34 “Yaubada avaha dewa habuhabuna
anamane-yehai,
wayahina, eha aitam koiaka ana pata
Yaubada na-mataede. Eha aitam.”✧

35 “Kadu eha aitam koiaka ana pata
Yaubada an' aga bou, e apaina
Yaubada nau-wawani na-nau-pata.
Eha aitam.”✧

36 Iuna dewa habuhabuna ai pai vi-putu
vivane Yaubada,
ka dewa habuhabuna yawai
vivane Yaubada,
ka dewa habuhabuna ai pai nau-yehata
vivane Yaubada.
Wayahina, tauna nau-wawani
tuta tuta itoka tomotau habuhabuka
papani aitamoata aitamoata wayahina
kawa-davedavei.
Ana pata deina.✧

12

Yaubada Ya Nuanua

1 Vavaneiu, yau vona wayahimia yami
leta taina a pai vi-putu a itoava baina
wayahina unuani. Yaubada avaha ate-nuanuai
habuhabuna venemi. Wayahina, itomi
nau-wawanimi ate-nuanuai-nana unuani,
ka Yaubada unau-kaiwei tauna ya nuanua

✧ **11:33:** Isa 55:8-9. ✧ **11:34:** Isa 40:13; 1Ko 2:16. ✧ **11:35:**
Iob 41:11. ✧ **11:36:** 1Ko 8:6.

wayahimi aitamoata deina. Yaubada ya nuanua itomi ininimi uawaehei tauna wayahina, vi-nomu yawayawaina deina. Nonova me Isiraeli vahitau ivunuvunui, ivi-nomui Yaubada ivo-vi-dewa-haiawi deina. Ka aituhu eha dewa goyona ininimia udedewe, akanai, ininimi vivane Yaubada a heta-ohota ya pai vi-nomu deina, e tauna uvo-vi-dewa-haiawi pai vi-nomu-nana wayahina.✠ ² Tupwai tomotau awaniamia imamaei, ka tau i eha Iesu it'-anamane. Tau i tau ma' tanopi yai dewa ivi-munie i. Kate itomi nau-wawanimi tau ma' tanopi yai dewa uvihahaiei. Aituhu Yaubada uawaehei tauna nuami na-vo-vi-vovou i, akanai apaina yawaimi na-vo-vinei ami pata tauna ya nuanua un'-anamanei ahiahina. Ka tauna ya nuanua wayahika ahiahina, kadu vo-vi-dewa-haiawika, ka kadu tauna ya nuanua mani nuanua habuhabui vane-tawane-vainei. Ka avi tuta dewa tunina tunina ivin'-omo-nananena, itomi ami pata dewaia utana-vewani, e un'-anamanei ahiahina o kadi goyona.

³ Yaubada am-venena awawaehina veneu, e avi-tau hae ananiu tauna wayahina. Wayahina, ataina aitamoata aitamoata wayahimia avonemi, “Eha unua-vane.” Nau-wawanimi naona ami heta yami vitumahana a bagibagi unuani. Iakwa, e unuanua wayahimi tunuhina deina, eha kik-ituna, eha ananina, kate aviani nau-wawanimi ana heta akanai.✠

⁴ Aitam pai dune avenemi unononi. Aitam tomotau ininina aitamoata-hoina, kate ininina

✠ **12:1:** Rom 6:11, 13; 1Pi 2:5. ✠ **12:3:** 1Ko 12:11; Epe 4:7; Pili 2:3.

hutana tunina tunina, ka hutana aitamoata aitamoata a paisewa kadu tunina tunina.✧ ⁵ Ka Tau Ito-yavuha ininina deinake. Aitamoata aitamoata wayahikaia tauna ininina hutana aitamoata deina, e habuhabuka nau-wawanika kaivaiteka. ⁶ Yaubada avaha am-venena-kavovo veneka, ka tauna yan^l am-venena-kavovo vivane tunina tunina aitamoata aitamoata wayahikaia, iuna paisewa tunina tunina mamaei wayahika. Wayahina, aitamoata aitamoata wayahimia avonemi taina deina. Aituhu aviyaivia wayahimia yami am-venena-kavovo un^l-apa-taputapu, akanai nau-wawanimi un^l-apa-taputapu a itoava yami vitumahana a bagibagi wayahina deina.✧

⁷ Ka aituhu aviyaivia wayahimia yami am-venena-kavovo upaipaisewa, akanai nau-wawanimi upaipaisewa deina. Ka aituhu aviyaivia wayahimia yami am-venena-kavovo tomotau uviwavenei, akanai nau-wawanimi uviwavenei. ⁸ Ka aituhu aviyaivia wayahimia yami am-venena-kavovo tuta habuhabuna uvitapewa yaiami uvo-vi-vatui, akanai nau-wawanimi yaiami uvo-vi-vatui. Ka aituhu aviyaivia wayahimia yami am-venena-kavovo yaiami am-venena-kavovo uvenevenei, akanai nau-wawanimi am-venena-kavovo uvenevenei. Ka aituhu aviyaivia wayahimia yami am-venena-kavovo tomotau ueta-naoi, akanai nau-wawanimi naona yawaimi udune-vi-avini ahiahina, e apaina yaiami uveimeyei tunuhina. Ka kadu aituhu aviyaivia wayahimia yami

✧ **12:4:** 1Ko 12:12, 27. ✧ **12:6:** 1Ko 12:4-11; 1Pi 4:10-11.

am-venena-kavovo yaiami un'-ate-nuanuaiei, akanai nau-wawanimi yami dewa-haiawa nui yaiami un'-ate-nuanuaiei.

⁹ Avi tuta kadune-nuanuaieka, nau-wawanika kadune-nuanuaieka tunuhina, eha kavitupu. Ka nau-wawanika dewa goyona kanau-nikonikoiei, ka kadu nau-wawanika dewa tunutunuhina kanua-tania. ¹⁰ Itomi vavaneimi. Wayahina, nau-wawanimi dune-nuanuai bagibagina wayahina udune-nuanuaiemi. Ka aitamoata aitamoata wayahimia nau-wawanimi uvo-kwayavoni vavaneimi kadu novunovumi ai wava usi-nai, kate eha ami wava usi-nai.✧

¹¹ Ka eha Yaubada ya paisewa wayahina uaupu-tonetonene kate nau-wawanimi paisewana wayahina uaupu-moimoiha.

¹² Kadu tuta tuta nau-wawanimi udewa-haiawa kadu yami nua-vaniaha nui Yaubada ya vona-dabadaba upotepotei. Ka avi tuta inahe uvaniahei, nau-wawanimi utoha-vi-anai. Ka avi tuta uviama Yaubada wayahina, eha u genuana, kate uviama a itoava tauna nau-patami wayahina.✧ ¹³ Ka aituhu Yaubada ya tomotau aitam gugua o aniani ivi-kutakuta, nau-wawanimi uaivaitei uvenevenei. Tuta tuta yami manua kadu ami ma' uvo-patai.✧

¹⁴ Tupwai tomotau inau-nikonikoiei, kadu dewa manimaninina idedewei wayahimia. Ka eha nau-wawanimi tomotau ubwanate, kadu eha unuanua apaina tau yai dewa goyona unau-patai yami dewa goyona wayahina. Eha.

✧ **12:10:** 1Pi 1:22. ✧ **12:12:** 1Te 5:16-18. ✧ **12:13:** Ebe 13:2.

Itomi nau-wawanimi tau i yai dewa goyona unau-patai yami dewa ahiahina wayahina.✠

¹⁵ Aituhu aviyaivia idewa-haiawa, akanai nau-wawanimi tau i nui udewa-haiawa. Ka kadu, aituhu aviyaivia inua-vita itoutou, itomi nau-wawanimi tau i nui utoutou deina.

¹⁶ Itomi habuhabumi nau-wawanimi una-ivaitemi umamaei ahiahina. Tau i ai wava ananina kadu tau i ai wava kikituna uvi-yaiane i, eha tau i ai wava ananina ai heta. Ka tuta tuta eha unuanua ami wava ananina.✠

¹⁷ Ka aituhu tomotau inau-haviemi, eha nau-wawanimi dewa goyona unau-patai. Nonova itomi yami dewa tutuaina udedewei deina. Aituhu yami dewana tutuaina ubou-ohoi, akanai uvidoha deina. Ka tuta habuhabuna mani tomotau idudueyemi yawaimi medeina, ahiahina o kadi goyona. Wayahina, nau-wawanimi dewa ahiahina ana heta udedewei. Ka aituhu mani tomotau idudueyemi, akanai, eha aitam iuna mamae apaina imana-giboemi.✠

¹⁸ Ka tuta tuta itomi tau ekalesia nau-wawanimi yami ma^l gomagomanina. Ka udewa-dadani mani tomotau eha ivi-putu inau-haviemi, ka aituhu aitam havia vi-putu, eha nau-wawanimi uvi-putui. ¹⁹ Nonova itomi yami dewa tutuaina ami havia unau-patai goyona wayahina. Kate ataina avonemi dewana ubou-ohoi. Itomi nau-wawanimi Yaubada uawaehei tauna ana heta dewa goyona a nau-pata vi-nua-dadani, kadu tauna ana heta

✠ **12:14:** Mat 5:44; 1Ko 4:12. ✠ **12:16:** VT 3:7. ✠ **12:17:** 1Te 5:15.

tomotau ai dewa-yaiyai venevenei. Iuna nonova
Yaubada ivona,

“Nau-pata dewa goyona wayahina
vivane yauke au heta-ohota
yau paisewa, ka apaina anau-patai.
Eha nau-wawanimi unau-pata.”✧

²⁰ Ka iginuma ainua ivona,

“Aituhu am havia am navovo,
nau-wawanim aniani evenevenei.
O aituhu magana ayaya,
nau-wawanim daudau evenevenei.”
“Aituhu dewa ahiahina ededewei
am havia wayahina deina,
vona ahiahina,
avaha eviwavenei
tauna ya nuanua wayahim vivane goy-
ona.
Iuna tauna nuanua wamke
tauna a havia, kate eha.
Wamke avaha eivaitei akanai.”✧

²¹ Eha goyona uawaehe na-veimeyemi,
ka kadu eha goyona udedewe. Eha-ohota.
Kate nau-wawanimi ahiahina eawaehei
na-veimeyemi, ka ami pata dewa goyona
ebagibagi-tawanei deina.

13

Tau Veimea Gabemani Kavi-ateteyei

✧ **12:19:** VV 32:35; Mat 5:39. ✧ **12:20:** VT 25:21-22; Mat 5:44.

1 Yaubada ya nuanua gabemaniV mamaei papani aitamoata aitamoata nihenia, ka kadu ya nuanua gabemaniV ai tau eta-naonao imamaei. Kadu Yaubada avaha awaehi tupwai tomotau mani tomotau iveimeyei. Wayahina, kadueyei Yaubada ya nuanua tau vi-meagai papani aitamoata aitamoata nihenia ai tau veimea gabemaniV ivi-ateteyei.✧ 2 Ka aituhu aviyaivia tau veimea-naia gabemaniV iapa-goyogoyoei o aituhu ivihahaiei, tau kadu Yaubada iapa-goyogoyoei kadue ivihahaiei deina. Iuna Yaubada gabemaniV vevewanei. Wayahina, aituhu aviyaivia Yaubada ivihahaiei, apaina tau ai dewa-yaiyai ivaniahei Yaubada wayahina. 3-4 Vona ahiahina, tau veimea gabemaniV vivane Yaubada ya tau paisewa. Ka Yaubada ya nuanua tomotau imamaei gomagomanina, ka kadu ya nuanua aituhu aviyaivia veimea itana-bwegebwegei akanai tau ai dewa-yaiyai ivaniahei. Wayahina, Yaubada tau veimea gabemaniV awaehi aituhu aviyaivia yai veimea itana-bwegebwegei, akanai idewa-yaiyaiei. Tau veimea gabemaniV eha yai dewa tomotau tunutunuhi idewa-yaiyaie. Wayahina, aituhu itomi yami dewa tunutunuhina, eha nau-wawanimi tau veimea gabemaniV umatamataute. Eha. Apaina tau iapa-vidovidohemi. Kate aituhu aviyaivia veimea itana-bwegebwegei, akanai tau nau-wawani tau veimea gabemaniV imatamatautei, iuna apaina tau dewa-yaiyai ivaniahei tau veimea gabemaniV wayahia.✧

✧ 13:1: Tit 3:1; VT 8:15. ✧ 13:3-4: 1Pi 2:13-14.

⁵ Wayahina, itomi tau ekalesia nau-wawanimi tau veimea gabemaniV udewa-didigunei. Iuna ainua mamaei yami dewana wayahina. Naona, aituhu itomi tau veimea gabemaniV udewa-didigunei, tau i eha idewa-yaiyaiemi. V^l-inuana, aituhu udewa-didigunei, avaha uanamanei dewana wayahina itomi kadu Yaubada udewa-didigunei deina. Ka aituhu itomi Yaubada ya tau paisewa udewa-didigunei, apaina ami ayaunena n^l-apa-vidovidohe mi.

⁶ Unononi. Tau veimea gabemaniV vivane Yaubada ya tau paisewa, ka Yaubada ya nuanua tau i veimeyeka ahiahina. Wayahina, aviani tau gabemaniV iveimeyemi udedewei, akanai itomi nau-wawanimi udedewei deina. Yami takesiV vivane tau ai nau-pata. Wayahina, nau-wawanimi tuta tuta yami takesiV uvenevenei.✧ ⁷ Ika. Itomi tau ekalesia nau-wawanimi yami takesiV aitamoata aitamoata tau veimea gabemaniV aitamoata aitamoata uvenevenei. Tupwai tau veimea gabemaniV yai veimea mamaei takesiV uvenevenei. Ka nau-wawanimi takesinaV uvenevenei. Ka kadu tupwai tau veimea gabemaniV yai veimea mamaei vi-maiena a takesiV uvenevenei. Ka kadu nau-wawanimi takesinaV uvenevenei. Itomi nau-wawanimi unua-opu kadu uvitumahanei tau i paisewa ahiahina ipaipaisewei, Yaubada ya nuanua wayahi deina. Wayahina, nau-wawanimi uapa-vidovidohei.

Vavaneika

Kadu

Novunovuka

✧ 13:6: Mat 22:21.

Kadune-nuanuaiei

⁸ Eha nau-wawanimi uawaehe ami aga mamae bana mamainana wayahina, kate nau-wawanimi ami aga aitamoata aitamoata unau-pata-yehai. Yaubada ya nuanua ananina vavaneika kadu novunovuka kadune-nuanuaiei. Ka dewana vivane ami aga deina, ka eha ami pata aga-nana unau-pata-yehai. Kate tuta tepakaia a itoava yami tuta na-iakwa wayahina, nau-wawanimi vavaneimi kadu novunovumi udune-nuanuaiei. Ka aituhu itomi udune-nuanuaiei, akanai Yaubada uvi-ateteyei deina. Ka Yaubada tauna ya veimea nihenina avaha ivona deina. ⁹ Yaubada ya veimea nihenina veimea tunina tunina imamaei. Ka veimea-naia tupwai ivona deina,

“Eha eawa-neme.”

“Eha enau-vi-aniga.”

“Eha evainau.”

“Eha matam ivenau-bana
am niam ya gugua wayahina.”

Ka kadu veimea habuhabui imamaei deina. Unononi. Veimea-naia aitamoata aitamoata ai nau-itava taina.

“Mani tomotau edune-nuanuaiei,
edune-nuanuaiem aitamoata deina.”

Veimeana vivane veimea ani-vainena. ¹⁰ Aituhu vavaneimi kadu novunovumi udune-nuanuaiei, eha memeanina wayahimia dewa goyona udedewe wayahia. Wayahina, aituhu aviyaviva

✧ **13:8:** Mat 22:39-40; Iam 2:8. ✧ **13:9:** NiT 20:13-15, 17; VV 5:17-19, 21.

mani tomotau idune-nuanuaiei, tau i Yaubada ya veimea a nau-itava idedewei.✧

Iesu Ya Mavina Maupwanina

11-12 Kadu aitam iuna mamaei eta-naoeka dewa tunutunuhina kadedewei. Iuna taina. Itoka yaka tuta tanopi taina wayahina eha manainaina. Ika, tuta kutakutana na-iakwa Iesu mavina kadueyei, e tauna ya vin'-omana yaka ito-yavuha na-nau-yehai. Ka kana-vona tuta ataina a itoava auyewana wayahina, aitam ioyoma novanovanina deina. Kate avi auyewa Iesu ya mavina kadueyei, akanai auyewana mahemaheina deina. Ka kadu auyewana a pai vi-putu eha bana tuta ataina wayahina, kate maupwanina. Wayahina, itoka tau ekalesia nau-wawanika dewa goyona kani-tawanei. Tau goyogoyona dewa-naia idedewei ioyoma nihenina. Ka itoka tau ekalesia nau-wawanika yaka dewa tau nau-havia yai dewa aitamoata deina. Wayahina, nau-wawanika kamini, e tau nau-havia yai gugua havia wayahina kan'-epei, kaweteni kadu kapoy'-avini.✧

13 Kadue nau-wawanika dewa ahiahina ana heta kadedewei, tomotau yai dewa tutana ianamanei mani tomotau idunedune. Eha nau-wawanika daudau bagibagina kanimnim, kavi-kwavakwava. Aituhu daudauna kanimnim, kaiwadi, apaina kakenekenene, o kadi kawa-nemei, o kadi wayahikaia kavi-naua, o kadi kavi-bwanoueka. Dewaia habuhabui eha ahiahina.✧ 14 Ka itoka Yaubada natunatuna.

✧ 13:10: 1Ko 13:4-7. ✧ 13:11-12: Epe 5:14; 1Te 5:6-7; 1Io 2:8.

✧ 13:13: Luk 21:34; Epe 5:18.

Wayahina, itoka nau-wawanika yaka Kauvea Iesu Tau Ito-yavuha kaweteni, aitam tau nau-havia ana kwama pai bou-pota weteweteni deina. Kwama-naia tau nau-havia ininina ibwaei. Ka avi tuta tomotau idudueyeka, akanai tau ai pata Iesu idudueyei, iuna tauna bwaeka. Wayahina, itoka tau ekalesia eha nau-wawanika kamai-nuanua goyona wayahina medeina kadedewe, apaina kadewa-haiawa. Eha. Nuanua taina eha nau-wawanika.✧

14

Vitumahana Bagibagina Ka Vitumahana Ihanuana

¹ Tupwai tomotau yai vitumahana bagibagina, ka tupwai tomotau yai vitumahana ihanuana. Wayahina, avi tuta aitam tomotau ya vitumahana ihanuana omo wayahimia, e ya nuanua na-nau-hohona itomi nui, akanai nau-wawanimi uawaehei nui utapanono, kate eha nau-wawanimi ya vitumahana ihanuana wayahina unau-yanahi.✧ ² Tupwai tomotau yai vitumahana bagibagina, ka tau i vitumahanei Yaubada avaha awaehei tau vahitau kadu aniani habuhabuna ianiana akanai. Kate vavanei tupwai yai vitumahana ihanuana, ka tau i vitumahanei tomotau nau-wawani Yaubada ya veimea tutuaina ivi-munie ataina, kadu tau i vitumahanei nonova Yaubada vahitau habuhabuna vito-potai, ka aniani ana heta awaehei ianiana.✧ ³ Wayahina, aituhi aviyaivia i vitumahanei Yaubada awaehei vahitau

✧ 13:14: Epe 5:11. ✧ 14:1: Rom 15:7. ✧ 14:2: Nao 9:3-4.

ianiania, akanai tau i eha nau-wawani vavanei imana-giboe, eha ivonevone, “Itomi yami vitumahana ihanuana.” Kadu deinake, aituhu aviyaivia yai vitumahana Yaubada vahitau vito-potai, akanai tau i eha nau-wawani vavanei imana-giboe, eha ivonevone, “Itomi Yaubada ya veimea utana-bwegebwegei. Wayahina, itomi tau goyogoyomi.” Aituhu uvonavona deina, uvona-kavokavovo. Iuna Yaubada avaha ivona, “Tau i tau tunutunuhi mataua.”✧

Eha Yaiami Umana-giboe

⁴ Aituhu aitam onoto mani onoto ya tau paisewa mana-giboei o nau-yanahi, dewana dewa goyona. Mani onotona ana pata tauna ya tau paisewa veimeyei akanai, ka tauna ana heta nau-wawani ya tau paisewa n'-apa-goyogoyoei o kadi n'-apa-vidovidoei. Udu. Yaubada bagibagi-vainena. Wayahina, tauna ana pata ya tau paisewa aitamoata aitamoata na-vo-vi-bagibagi, e tau i yai paisewa ipaipaisewei ahiahina. Wayahina, apaina aitamoata aitamoata wayahia ai nau-pata ahiahina ivaniahe i.✧

⁵ Tau ekalesia tupwai ivitumahanei tau i nau-wawani me Iudea yama auyewa anani inuani kadu nau-wawani itapanono auyewaia wayahina. Ka yai i tupwai ivitumahanei Yaubada avaha me Iudea yai auyewa anani kweui iakwa. Wayahina, yai i ivitumahanei tuta ataina eha aitam auyewa ananina ta-mamae. Yai i ivitumahanei ai pata itapanono auyewa

✧ 14:3: Kol 2:16. ✧ 14:4: Mat 7:1; Iam 4:11-12.

aitamoata aitamoata wayahina. Tau ekalesia habuhabui yai dewa deina iuna aitamoata aitamoata wayahia yai nuanua yai Kauvea ivo-vi-dewa-haiawi, ka kadu yai nuanua ivi-tau paisewa ahiahina. Akanai ka, itoka tau ekalesia aitamoata aitamoata nau-wawanika naona Yaubada movina kanononi, e munia yaka etawana tapanono wayahina kavi-nua-dadani tunuhina.✧ ⁶ Nau-wawanika kadedewei deina, iuna aituhu aviyaivia ivitumahanei auyewa anani imamaei, akanai tau yai nuanua Yaubada ivi-ateteyei ahiahina. Ka kadu aituhu aviyaivia ivitumahanei Yaubada awaehei vahitau ianiana, tau Yaubada inau-kaiwei vahitau-nana wayahina deina. Ka kadu aituhu aviyaivia ivitumahanei Yaubada aniani ana heta awaehei ianiana, tau yai nuanua Yaubada ivi-ateteyei deina. Wayahina, tau vahitau ivihahaiei, kadu Yaubada inau-kaiwei.

⁷ Ka vona tunuhina, eha aka pata itoka aka heta yawaika kaveimeye. Eha. Aituhu aitam onoto yana tuta iakwa, tauna eha ana pata yana nae veimeye, e ya pai ma' vi-nua-dadani. Eha-ohota.

⁸ Aituhu ataina itoka yawayawaika, akanai yawayawaika deina iuna Yaubada yawai-nana veneveneka. Ka apaina Kauvea yaka tuta vi-nua-dadani, ka kadu tauna yaka pai ma' vi-nua-dadani. Wayahina, tuta tuta yaka Kauvea aitamoata aitamoata wayahikaia veimeyeka. Tauna yawaika tanopi taina wayahina veimeyei, kadu tauna yawaika apaina wahuma veimeyei aitamoata deina.✧

✧ 14:5: Gal 4:10-11. ✧ 14:8: Gal 2:20.

9 Udu! Nonova Tau Ito-yavuha Iesu tanopia mamaei, ka aniga, ka kadue mini-havine yawayawaina. Tauna dewei deina, ka tuta ataina tauna tau i yawayawai yai Kauvea, ka tauna kadu tau i aninigai yai Kauvea. 10 Vonana vona ahiahina, ka taumi medeina? Aituhu itomi Yaubada ya paisewa upaipaisewei, kate aituhu vavaneimi uapa-goyogoyoei o aituhu unau-yanahi, yami dewana eha ahiahina. Aituhu vavaneimi wayahi uvonavona, “Akanai, tau i nau-wawani dewa-yaiyai ivaniahe i ai nau-pata yai dewa goyona wayahia akanai,” ka aituhu taumi wayahimi unuanua, “Yauke onoto ahiahiu. Apaina au nau-pata ahiahina Yaubada wayahina avaniahe i akanai,” yami dewana eha tunuhina. Yaubada yaka dewa habuhabuna dudueyei. Ka apaina, vitana matana an' auyewa wayahina, tauna ana heta ana pata voneka, “Wamke ahiahim,” o kadi, “Wamke goyogoyom.”☆

11 Iginuma nihenina ivona deina,

“Yaubada ivona, Vona ahiahina,
apaina tomotau aitamoata aitamoata
iaiwaodu kadu inua-opu mataua.

Kadu aitamoata aitamoata wayahia nau-wawani
iawaehe i yauke au heta-ohota
vivane Yaubada.’”☆

12 Iginuma taina voneka apaina Yaubada aita-
moata aitamoata wayahikaia vi-tanatanaieka,

☆ 14:10: 2Ko 5:10. ☆ 14:11: Isa 45:23; Pili 2:10-11.

“Aviani wayahina yam dewa aitamoata aita-moata ededewei? Nau-wawanim evona-nau-pata wayahiua tunutunuhina.”

Kagenuana Ka Eha Kanau-yanahika

¹³ Wayahina, itoka tau ekalesia eha nau-wawanika kanau-yanahika o kanuanua, “Yauke onoto ananiu, kadu yauke yau dewa ahiahina ana noe. Yauke nau-wawaniu mani tomotau anau-yanahi, e ai dewa-yaiyai yai dewa goyona wayahina avi-nua-dadani.” Nau-wawanika nuanuana kani-tawanei. Itoka aitamoata aitamoata nau-wawanika kadune-vivinika itoka yaka dewa tunutunuhina. Aituhu aitam wayahikaia aitam dewa dewei, kaiwadi aituhu vaneina dewana dueyei, e apaina kadi nuanua, “O, dewana au pata. Yauke kadu adedewei deina, akanai.” Apaina tauna vi-putu dewa-nana dedewei. Kate tauna ya vitumahana eha ana pata dewa-nana wayahina.

¹⁴ Yauke Kauvea Iesu nihenina amamaei, kadu yauke tauna hutana aitam. Ka avaha Yaubada yana ipupu vahitau kadu aniani wayahia anamane-yehai. Tauna eha ta-vona, “Vahitau taina gawagawamina, wayahina avito-potei. Eha en'-ania.” Yauke yau vitumahana deina.

Ka kaiwadi, aituhu mani onoto nuanua aitam aniani wayahina deina, “Nonova Yaubada aniani taina wayahina ivona vivane aniani vito-potana. Wayahina, ataina eha nau-wawaniu an'-ania.” Aituhu onotona aninina n'-ania, tauna avaha dewa goyona dewei, iuna ya vitumahana eha ana pata ya dewana n'-awaehe tunuhina. Un-uani. Ataina veimea tutuaina eha veimeyeka,

kate yaka vitumahana veimeyeka. ✧ ¹⁵ Wayahina, aituhu vavaneimi eha yai vitumahana aitam aniani wayahina, itomi nau-wawanimi eha aninina un'-ani tau mataia. Iuna aituhu tau idudueyemi uania, kaiwadi apaina tau aninina ina-uta-dadana, kate eha yai vitumahana bagibagina nui. Apaina tau ina-ini-yauyau Yaubada matana iuna tau inuanua avaha dewa goyona idewei tutana aninina vito-potana iania. Aituhu dewaia habuhabui ivin'-omo deina, kana-vona itomi yami dewana eha tunutunuhina, iuna yami dewana eha ta-vin'-omo yami dune-nuanuai vavaneimi wayahi. Kaiwadi, itomi yami dewana avaha vavaneimi yai vitumahana vi-goyoi. Ka unuani, Iesu aniga kadu vavaneimi wayahi, tauna aniga wayahimi aitamoata deina. ✧

¹⁶ Dewa tupwai uvitumahanei vivane dewa ahiahi. Kadu uvitumahanei Yaubada avaha awaehemi udedewei akanai. Kate aituhu mani tau ekalesia idudueyemi udedewei, munia tau imana-giboemi, iuna tau ivitumahanei dewa-naia dewa goyona. Akanai ka, aituhu dewa-naia uvito-potami, akanai, itomi uvidoha deina.

¹⁷ Avi-tanaemi, avi dewa dewa anani Yaubada matana? Kaiwadi aka ma' o kadi aka nim dewa ananina aitam? Eha. Dewa anani Yaubada matana vivane dewaia ivin'-omo Nuana Ahihinata wayahina. Dewaia vivane dewa tunutunuhina kadedewei, ka kadu nua gomagomanina kavaniahei mamaei wayahikaia, ka kadu kadewa-haiawa Nuana Ahihinata nihenina. ¹⁸ Ka aituhu aviyaivia Tau Ito-yavuha

✧ **14:14:** Dew 10:15; Tit 1:15. ✧ **14:15:** 1Ko 8:11-13.

wayahina ipaipaisewa deina, akanai tau
 Yaubada ivo-vi-dewa-haiawi, kadu apaina mani
 tomotau iapa-vidovidohei yai dewaia wayahi.
 19 Wayahina, habuhabuka nau-wawanika
 dewaia ahiahi kawaehei kadedewei, vivane
 dewaia ieta-naoeka nua gomagomanina
 nihenina kamamaei, kadu ieta-naoeka vavaneika
 kan'-ate-vatui ividoha deina.✧

20 Eha Yaubada ya paisewa tau ekalesia
 nihenia uvita-vovoni ami vahitau wayahina,
 kadu eha uvita-vovoni ami aniani wayahina.
 Avona-havinemi, vahitau aitamoata aitamoata
 ahiahina, kadu aniani aitamoata aitamoata
 ahiahina. Kate aituhu vavaneimi ivitumahanei
 aitam vahitau vito-potana, akanai tau wayahi
 vahitau-nana vivane vito-potana. Kadu aituhu
 tau idudueyemi vahitauna uania, kaiwadi,
 apaina tau vahitau-nana ina-uta-dadani, ka yai
 vitumahana eha dewana n'-awaehe tunuhina.
 Wayahina, tau yai vitumahana igoyo deina.✧

21 Aituhu avi dewa uvi-putu udedewei, ka aituhu
 mani tau ekalesia idudueyemi, ka aituhu dewaia
 vivane dewa goyona tau wayahi, akanai itomi
 nau-wawanimi dewaia ubouni. Dewaia tupwai
 deina, vahitau kania, o daudau bagibagina
 kanimnim, o mani dewa mani dewa wayahi
 vavaneimi yai vitumahana eha ana pata.

22-23 Itomi yami vitumahana mamaei, kadu
 avaha uanamane-yehai dewa tupwai dewa ahi-
 ahi, kadu Yaubada eha dewaia ta-vito-potai.
 Akanai. Itomi nau-wawanimi yami vituma-
 hanana unua-tania. Kate unuani. Avaha ua-

✧ 14:19: Rom 12:18; 15:2. ✧ 14:20: 1Ko 8:13.

namanei Yaubada aitam dewa awaehemi udedewei, wayahina, udedewei akanai. Kate aituhu vavaneimi iomomo idudueyemi, ka aituhu tau i vitumahanei dewana vivane dewa vito-potana Yaubada wayahina, goyona avaha vin'-omo. Kai-wadi apaina tau in'-ate-vatu, e ivi-putu idedewei, iuna tau idudueyemi, udedewei. Ka munia, avaha dewana idewei iakwa, avi tuta tau dewana inuani, akanai nuai yai dewaia n'-apa-goyogoyoei. Wayahina, vona ahiahina, tau avaha dewa goyona idewei, ka iuna vivane itomi.

Apaina Yaubada yana vona wayahimia eha ahiahina. Iuna avi tuta yaka dewa ivin'-omo yaka vitumahana wayahina, akanai dewaia wayahina Yaubada n'-apa-vidovidoheka. Kate aituhu aitam dewa kadewei, ka aituhu nuaka nihenina kavitumahanei dewana vivane dewa goyona, akanai kana-vona Yaubada awaehi aitamoata nuaka wayahina vivane dewana dewa goyona wayahika.

15

Vavaneika Kavo-vi-dewa-haiawi, Eha Itoka Aka Heta

¹ Vavaneiu, ekalesia nihenina yoko ainua imamaei. Tupwaka yaka vitumahana bagibagina, ka tupwaka yai vitumahana ihanuana. Itoka yaka vitumahana bagibagina yaka paisewa mamaei, vivane nau-wawanika katoha-vi-anai tau yai vitumahana ihanuana wayahi. Aituhu itoka bagibagika kadewa-haiawa, ka aituhu tau kanua-paniei, dewana eha ahiahina.

2 Nau-wawanika tuta tuta mani tomotau kavo-vi-dewa-haiawi, e tau i yai vitumahana yaka Kauvea wayahina natanata deina.✠ 3 Iuna tutana Iesu omo tanopia, tauna eha aviani ya nuanua ta-dedewe. Eha. Iginuma nihenina Iesu yana ipupu Yaubada wayahina apa-taputapuei, ivona,

“Naona tomotau imana-giboem.

Ka ataina yauke aomo wayahia,
ka kadu imana-giboeu deina.”✠

4 Yaubada ya tau apa-taputapu aitamoata aitamoata yai iginuma mamaei. Ka Yaubada ya nuanua iginuma-naia wayahi iviwaveneka, kadu aka pata nua-vaniaha kavaniahei wayahia. Ka itoka nau-wawanika kagwagwaheyeyi a itoava aviani Yaubada vona-dabedabei kavaniahei wayahina.✠ 5 Ka gwahea kadu ate-vatu ainua kavaniahei Yaubada wayahina, ka tauna ya nuanua veneveneka deina. Ka yau viama itomi me Rom wayahimi Yaubada na-ivaitemi Tau Ito-yavuha Iesu uvi-muni-waiwaiei, e uvi-putu unuanua aitamoata. 6 Wayahina, apaina itomi habuhabumi ami ayaunena aitamoata, ka kadu yami ipupu aitamoata. Ka aituhu uvi-yoko aitamoata deina, ami pata Yaubada didigana uvo-vi-natei. Tauna yaka Kauvea Iesu Tau Ito-yavuha Amana.

Vaneana Ahiahina Yoko Ainua Wayahi

✠ 15:2: 1Ko 10:24, 33. ✠ 15:3: Sam 69:9. ✠ 15:4: 2Ti 3:16.

7 Nonova aitamoata aitamoata wayahimia tau goyogoyomi, kate Tau Ito-yavuha awaehemi uvi-niana tauna wayahina. Ka dewana wayahina Yaubada didigana nata. Wayahina, tuta ataina nau-wawanimi unau-kaiwemi kadu habuhabumi uvi-yaiana aitamoata deina.✧

8 Unononi avonemi. Nonova Yaubada me Iudea ya vona-dabadaba venei. Ka munia Tau Ito-yavuha vin'-omo tanopia, ka vona ahiahina, tauna vona-dabadaba-naia ai nau-itava. Ka kadu tauna vi-tau paisewa itoai me Iudea wayahiai, ka viwaveneai Yaubada ya vona-dabadaba yama tupua-nenenehi wayahia vivane vona tunutunuhina.✧

9 Ka Yaubada ya nuanua kadu tau eha me Iudea ate-nuanuai ivaniahei tauna wayahina, e munia tau tauna didigana ivo-vi-natei. Ka mataina habuhabuna Iginuma nihenina Yaubada ya nuanuana iapa-taputapuei. Aitam mataina ivona,

“Yau nuanua awa-davem
tau eha me Iudea mataia inononi,
ka kadu yau ahe nihenina
am wava asi-nai inononi.”✧

10 Ka kadu aitam mataina ivona,

“Itomi eha me Iudea nau-wawanimi
tauna ya tomotau me Iudea nui
udewa-haiawa.”✧

11 Ka kadu aitam ivona,

✧ 15:7: Rom 14:1. ✧ 15:8: Mat 15:24. ✧ 15:9: Dew 3:25; Sam 18:49. ✧ 15:10: VV 32:43.

“Itomi eha me Iudea habuhabumi
 nau-wawanimi
 Kauvea uawa-davedavei.
 Ika, itomi habuhabumi
 papani aitamoata aitamoata wayahina
 nau-wawanimi
 uahehe kadu uawa-davedavei.”✧

¹² Ka kadu aitam mataina nihenina Isaia gin-
 umi deina,

“Iese aitam abaniana, ka tauna wayahina
 aitam dumna na-tabo, na-vane,
 ka dumnana tau i eha me Iudea veimeyei.
 Ka tau i yai nua-vaniaha nui
 tauna ipotepotei, na-ito-yavuhi-neiei.”✧

¹³ Yaka nua-vaniaha ahiahina vin'-omo
 Yaubada wayahina. Ka yauke yau viama
 Yaubada wayahina tauna na-ivaitemi uvituma-
 hanei, ka kadu yau viama tauna dewa-haiawa
 wayahina kadu nua gomagomanina wayahina
 ainua vi-nau-vi-anaimi. Iuna yau nuanua Nuana
 Ahihinata ya bagibagi uvaniahei, e munia yami
 nua-vaniaha natanata, e na-ito-iwaiwahi.

Paulo Ya Paisewa Tau i Eha Me Iudea Wayahi

¹⁴ Vavaneiu, avaha anamane-yehai itomi me
 Rom yami nua-uya mamaei. Ka kadu anamanemi
 dewa tunutunuhina udedewei, ka anamanemi
 itomi ami pata vavaneimi kadu novunovumi
 uviwavenei. ¹⁵⁻¹⁶ Kate itomi unuani. Yaubada
 am-venena awawaehina veneu. Yauke eha
 dewa ahiahina ata-dewe, e Yaubada nau-patau

✧ **15:11:** Sam 117:1. ✧ **15:12:** Isa 11:10; SiV 5:5.

deina. Eha. Tauna veneu awawaehina. Ka kadu tauna awaehēu avi-tau nau-wahe Tau Ito-yavuha Iesu wayahina, ka tauī eha me Iudea anaunau-wahei. Yaubada veimeyeu paise-wana ananina adedewei. Wayahina, yami leta taina aginumi omomo wayahimia. Habuhabuka nuaka ni-panipani. Wayahina, yauke eha ata-ini-yauyau pai mini ananina yaka vitumahana wayahina avona-havinemi unuani. Iuna yau nuanua adune-vivinimi ahiahina.

Ka yau paisewa Yaubada wayahina aitam tau vi-nomu deina. Iuna tau vi-nomu yai dewa am-venena-kavovo iam-veneneyei, e Yaubada ivo-vi-dewa-haiawi wayahia deina. Ka yau nuanua tauī eha me Iudea habuhabui aomanei Yaubada wayahina, aitam am-venena-kavovo deina, e tauī Yaubada ivo-vi-dewa-haiawi, ka Yaubada am-venena-kavovo-nana n'-awaehēi vi-vane tunuhina matana. Ka kadu yau nuanua Nuana Ahihinata bou-keyemi, Yaubada ya nuanua tunuhina ana heta udedewei. ✧ ¹⁷ Yaubada paise-wana ananina veneu, ka yauke Tau Ito-yavuha Iesu wayahina apaipaisewa, ka didigau avania-hei paisewana wayahina.

¹⁸ Ataina eha kadu aitam paisewa wayahina aipui-pupu. Paisewa aitamoata ana heta wayahina aipui-pupu, vivane paisewana Tau Ito-yavuha ivaiteu adedewei tauī eha me Iudea wayahi. Yau vona kadu yau dewa wayahia tauī eha me Iudea aeta-naoei Yaubada ivi-ateteyei. ¹⁹ Yauke anaunau-wahei ka Nuana Ahihinata awaehēu iaiaya kadu dewa-bagibagi adedewei

✧ **15:15-16:** Rom 1:5; 11:13.

idudueyei. Ka avi-putu meagai Ierusalem wayahina, e Vaneana Ahiahina anaunau-wahei tau i eha me Iudea tenoke imamaei wayahia. Ka paisewana adedewei a itoava papani Ilirikum avaniahei wayahina.^a ²⁰ Tuta tuta yauke yau nuanua ananina Yaubada n'-awaeheu yauke anaunau-wahe tau i eha Vaneana Ahiahina ita-nononi wayahia. Nonova, tutana avi-putu anau-wahe, a itoava tuta ataina wayahina, yau nuanua ananina aeta-naoi deina. Eha yau nuanua mani onotona ya nau-wahe hetana ayoneyone.[☆] ²¹ Iginuma nihenina ivona deina,

“Tupwai tomotau eha aitam tuta
tauna vaneana ita-nononi.
Kate avi tuta mataedana inononi,
akanai tau i ianamanei.
Ka kadu avi tuta tau i mwagemwagei
vaneana inononi,
akanai inua-hau i.”[☆]

*Paulo Ya Nuanua Tauna Me Rom
Na-nau-vi-tau i*

²² Paisewa ananina taina wayahina yauke yau nae bana mamanaina habuhabui akanai. Wayahina, tuta nonova a itoava tuta ataina wayahina, eha au pata ata-omo yami meagai

^a **15:19:** Vona taina vona baimina. Aituhu kana-vona Bwailele a itoava Toagesi wayahina vona taina an' anamana deina. Vaneana Ahiahina vi-putu meagai Ierusalem nihenina, ka Paulo yana tuta nihenina papani Ilirikum papani pai nau-yehata deina, iuna papani Ilirikum mamaei bana mamanaina Ierusalem wayahina.

[☆] **15:20:** 2Ko 10:15-16. [☆] **15:21:** Isa 52:15.

Rom wayahina. Kate ponimana habuhabui nihenia yau nuanua ananina an'-omo Rom wayahina, e anau-vi-taumi.✧ 23-24 Ka avaha yau paisewa anau-yehai papani habuhabui nihenia, vivane papani hawana taina awaniana imamaei. Baina eha kadu aitam papani ta-mamae. Ka avaha yau vi-nua-hauhau aboui munia hawana aubo-tamana aomomo papani Sipaini papanimia. Ka yau nae dobwana wayahina yau nuanua ana-nu Rom wayahina, e kanau-basekwa. Ka nui kamamaei tuta tupwana wayahina, e munia itomi tau ekalesia Rom ami pata una-ivaiteu yau nae papani Sipaini wayahina. 25 Taina yau nuanua tuta tepakaia wayahina.

Kate ataina paisewa tunina mamaei, kadu yauke nau-wawaniu naona paisewana anau-yehai. Tau ekalesia me Iudea Ierusalem wayahina am inavovo. Wayahina, nonova avi-putu kina akwakwei ekalesia eha me Iudea wayahia, ka yau nuanua kina-naia an'-epe i avane Ierusalem wayahina, e tau ekalesia tenoke an'-am-veneneyei, e aniani ivi-maiei.✧

26 Paisewana vi-putu deina. Tau ekalesia eha me Iudea imamaei papani Masedonia nihenina kadu imamaei papani Akaia nihenina. Ka yauke avaha amataedai tau ekalesia Ierusalem wayahia am inavovo. Ka tutana inononi, tau i yai nuanua ananina am-venena ivo-vi-aiaia ina-ivaitei.✧ 27 Ka tau i idewa-haiawa avaha am-venena awawaehina iveneu. Kate udu! Tau i nau-wawani inau-patai deina. Iuna dewa

✧ 15:22: Rom 1:13. ✧ 15:25: 1Ko 16:1-4. ✧ 15:26: 1Ko 16:1; 2Ko 8:1; 9:2, 12; Dew 24:17.

ahiahina nuai wayahi omoi wayahia me Iudea wayahikaia. Yauke dewa ahiahina nuaka wayahi aepei, an'-omo papani Masedonia wayahina kadu an'-omo papani Akaia wayahina, e dewa-naia avo-patai tau eha me Iudea wayahia. Wayahina, ataina tau nau-wawani inau-patai dewa ahiahina inini wayahi.✠

²⁸ Akaka am-venenana akwakwei na-iakwa, e yau nuanua yaiiau nui an'-omo Ierusalem wayahina. Ka aituhu nimaua kina-naia avenei, an'-anamanei avaha ivaniahai. Na-iakwa, yau nae papani Sipaini wayahina avi-putu. Ka dobwana ana-nu Rom wayahina, e itomi tau ekalesia anau-vi-taumi, kanau-basekwa. ²⁹ Tau Ito-yavuha avaha nau-iaiava habuhabuna nuaka wayahi veneu, ka avaha anamanei tauna ya nuanua nau-iaiava-naia avo-patami uvaniahei.✠

Paulo Me Rom Viamei Tau Iviama Tauna Wayahina

³⁰ Vavaneiu, ataina yauke avo-vi-vatumi yau paisewana ananina wayahina una-ivaiteu yami viama wayahina. Ka kadu avitumahanei yaka Kauvea Iesu Tau Ito-yavuha ya nuanua una-ivaiteu deina. Ka aituhu avaha dune-nuanuai uvaniahei Nuana Ahihinata wayahina, akanai nau-wawanimi uviama Yaubada wayahina, e una-ivaiteu deina.✠

³¹ Wayahina, aviamemi Yaubada uviamei avi tuta papani Iudea avaniahei, akanai tauna dune-viviniu ahiahina. Iuna tupwai tomotau tenoke imamaei eha Iesu ita-vitumahane, ka tau

✠ **15:27:** 1Ko 9:11. ✠ **15:29:** Rom 1:11. ✠ **15:30:** 2Ko 1:11; Kol 4:3; 2Te 3:1.

manimanini. Ka yau nuanua Yaubada uviamei tauna tomotaui nimaia na-ito-yavuhui.

Ka kadu nau-wawanimi uviama tau ekalesia me ludea meagai Ierusalem imamaei iawaehei yau paisewa tau wayahi vivane dewa ahiahina.

³² Ka paisewa tanoi habuhabuna na-iakwa, e aituhu Yaubada ya nuanua, kadu aituhu tauna n'-awaeheu, e yauke avenau-haihaiawa wayahimia, e nui kavi-yawai. ³³ Ka yau viama wayahimi Yaubada nui umamaei. Nua gomago-mani-hoina vin'-omo tauna ana heta wayahina. Ana pata deina.

16

Paulo Me Rom Mataedai Poebe Wayahi

¹ Yauke yau nuanua ahaeyemi novuka ai wawa Poebe wayahi.^a Vavinena taina aitam tau paisewa ahiahina, ka tau ai wawa ananina meagai Kenikirea yai ekalesia nihenina.^a ² Ka avi tuta Poebe iomo wayahimia, nau-wawanimi unau-kaiwei kadue udune-vi-avini ahiahina. Iuna itomi Yaubada natunatuna, ka vavinena kadu Yaubada natuna aitamoata deina. Ka apaina Poebe nau-wawani nui umamaei meagai Rom nihenina a itoava yai mavina ana

^a **16:1:** Tomotau sinasinapui ivona deina. Paulo me Rom yai leta taina Poebe venei vi-tunei iomo Rom wayahina, ka me Rom eha Poebe it'-anamane. Wayahina, Paulo ai wawa mai-tomani yai leta nihenina, e in'-anamane vavine ahiahi. ^a **16:1:** Korinita aitam me Girihi yai meagai ananina, ka tupwana nihenina mamaei. Aituhu Korinita kani-tawanei kana-opu tania, meagai Kenikirea kavaniahei. Wae habuhabuna inuina Kenikirea wayahina, ka tenoke gugua ivi-opui meagai Korinita wayahina.

tuta wayahina. Ka tuta-nana nihenina itomi nau-wawanimi una-ivaitei aniani, pai ma', kina, aviani nau-wawani wayahi. Dewana dewa tunutunuhina. Iuna tuta tuta Poebe tomotau iaivaitei. Ika, kadu taua iaivaiteu deina.

Paulo Ya Nau-kaiwa Yaiana Wayahia

³ Ataina yauke yau nuanua yaiau habuhabui Rom wayahina anau-kaiwei. Pirisika^a ka Akuila anau-kaiwei. Yauke nui apaipaisewa Tau Ito-yavuha Iesu wayahina.✧ ⁴ Nonova ainuai yai nuanua ina-ivaiteu, ka idedewei, kate tutana iaivaiteu, eha ani-hoina inusi. Wayahina, ataina ayaune au aga wayahia mamaei, ka tuta tuta yai dewa anuani ka anau-kaiwei. Ka eha yauke au heta, ka tau ekalesia eha me Iudea habuhabui inau-kaiwei yai ate-vatu wayahina. ⁵ Ka tau ekalesia tupwai inau-hohona Pirisika ka Akuila yai manua nihenina. Kadu yau nuanua tau ekalesia-naia unau-kaiwei wayahiu.

Ka au niau ahiahina ana wava Epaenetusi unau-kaiwei wayahiu. Tauna Tau Ito-yavuha mai-vitumahanei papani Asia nihenina.

⁶ Kadu vavine ai wava Mari unau-kaiwei wayahiu. Tau i yai paisewa toyoina taumi wayahimi.

⁷ Ka Anidoronikusi ka Iuniasi unau-kaiwei wayahiu. Ainua me Iudea, yauke deina. Nonova tau i naona ivi-tau ekalesia, ka yauke munia. Ka aitam tuta tomotau iyohonai, e manua yohona

^a **16:3:** Paulo leta taina nihenina vavine taina ana wava tomani Pirisika. Tomotau yaiai ahiahina ai wava ivo-vi-kutei deina. Ana wava mamanaia kavaniahei Dew 18:2 wayahina, vivane Pirisikila. ✧ **16:3:** Dew 18:2.

nihenina amamae. Itoai tau hae ananiai avaha ainuai anamanei ahiahina, ka ai wava asi-nai.

⁸ Ka Ampiliatusi unau-kaiwei wayahiu. Tauna vaneiu Tau Ito-yavuha nihenina, ka adune-nuanuaiei.

⁹ Ka Uribanusi unau-kaiwei wayahiu. Tauna aitam tau paisewa Tau Ito-yavuha wayahina, yauke deina.

Kadu au niau ahiahina ana wava Sitakusi unau-kaiwei wayahiu.

¹⁰ Kadue Apelesi unau-kaiwei wayahiu. Tutana tauna inahē vaniahei, akanai tauna Tau Ito-yavuha vi-ateteyei, ka ya vitumahana toyoina viwaveneka deina.

Ka Arisitobulusi yana yoko habuhabuna unau-kaiwei wayahiu.

¹¹ Ka Erodiona kadu aitam me Iudea yauke deina, ka unau-kaiwei wayahiu.

Ka vavaneiu Narikisusi yana yoko tupwai Tau Ito-yavuha nihenina imamaei, ka unau-kaiwei wayahiu.

¹² Ka vaivine ainua ai wava Tirupaena ka Tiruposa unau-kaiwei wayahiu. Taii ipaipaisewa toyoina Kauvea nihenina.

Kadue au niau ahiahina ai wava Perisisi unau-kaiwei wayahiu. Vavine taina yai paisewa Kauvea nihenina vivane ananina.

¹³ Kadue Rupusa unau-kaiwei wayahiu. Tauna tau paisewa ahihi-vainena Kauvea wayahina. Kadue tauna ayona unau-kaiwei wayahiu. Taii yai dewa ahiahina wayahiu, ayou deina.✧

¹⁴ Ka Asunikiritusi, ka Pilegoni, ka Eremesi, ka Patirobasi, ka Eremasi unau-kaiwei wayahiu.

✧ **16:13:** Mar 15:21.

Kadue vavaneiu aitamoata aitamoata Tau Ito-yavuha nihenina tau nui unau-kaiwei wayahiu.

¹⁵ Ka Pilologusi ka Iulia unau-kaiwei wayahiu.^a Kadu onotona Nereusi tauna novuna nui unau-kaiwei wayahiu. Ka Olimpasi kadu Yaubada ya tomotau habuhabui nui imamaei unau-kaiwei wayahiu.

¹⁶ Ka yau nuanua habuhabumi unau-kaiwemi tau ekalesia yai mao ahihinata wayahina.

Ka kadu tau ekalesia papani aitamoata aitamoata nihenia yai nau-kaiwa iva-tawanei omomo itomi tau ekalesia Rom nihenina wayahimia.✠

Paulo Ya Viwavenena Pai Nau-yehata

¹⁷ Yauke yau vona panina taina wayahina amai-vonemi, vivane udune-vivinimi ahiahina. Iuna tupwai tomotau yai dewa goyona. Tau iomomo inuinu ekalesia aitamoata aitamoata nihenia, e ivi-putu inau-wahe kadu iviwavenena, kate tau yai viwavenena eha tunuhina. Aituhu itomi tau ekalesia yai viwavenena bwagona unononi, apaina tau yami vitumahana ivo-v'-ihanuei, ka kadu tau itana-vewanimi deina. Nonova viwavenena tunutunuhina unononi, uvitumahanei, ka ataina viwavenena tunutunuhina wayahimia mamaei. Kate tomotau vivane viwavenena tunutunuhina a havia. Eha tau nui uvi-yaiana!✠

^a **16:15:** Iulia aitam vavine, ka kaiwadi Pilologusi ya vavine. Eha kat'-anamane ahiahina. ✠ **16:16:** 1Ko 16:20; 1Pi 5:14. ✠ **16:17:** Mat 7:15; Tit 3:10.

18 Tau tau viwavenena vitupu, ka eha ipaipaisewa yaka Kauvea Tau Ito-yavuha wayahina. Eha. Yai dewa vin'-omo yai nuanua ananina wayahina. O kadi aviani nuai epei ananina, akanai tau dewaia idewa-dadani ivaniahei yai vitupu wayahina. Tau tau ipupu ahiahi. Wayahina, memeanina wayahia tomotau iana-dibidibiei. Tau ekalesia tupwai vivane tomotau ahiahi, kate eha sinasinapui. Ka memeanina tau viwavenena vitupu tau ekalesia-naia inonoi.☆ 19 Kate itomi tau ekalesia Rom wayahina yami dewa eha tau vitupu-naia yai dewa deina. Tau ekalesia habuhabui papani tunina tunina wayahina avaha inononi itomi Yaubada uvi-ateteyei tunuhina. Wayahina, yauke adewa-haiawa ananina wayahimi. Ka yau nuanua wayahimi dewa ahiahina un'-anamane-yehai, kate dewa goyona wayahina mwagemwagemi umamaei akanai. Iuna yau nuanua dewa ahiahina udedewei, ka kadu yau nuanua eha aitam dewa goyona udewe.☆

20 Itoka tau ekalesia yaka nua gomagomanina vin'-omo Yaubada wayahina. Ka tuta eha ani-hoina na-iakwa wayahina tauna na-ivaitemi Satana kadu tauna ya tau paisewa uva-taunei. Ka tuta tuta yaka Kauvea Iesu aviamei tauna am-venena awawaehina venevenemi.☆

Mani Tomotau Yai Nau-kaiwa Yaiai Wayahia

21 Timoti baina nui apaipaisewa, kadu tauna ya nau-kaiwa va-tawanei omo habuhabumi wayahimi.

☆ **16:18:** Pili 3:19; 2Pi 2:3. ☆ **16:19:** Rom 1:8; 1Ko 14:20.

☆ **16:20:** Nao 3:15.

Ka kadu Lukiusi, ka Iasoni, ka Sosipateri inau-kaiwemi. Tau i aitonu me Iudea.✠

²² Ka yauke au wava Teritiusi yami leta taina aginumi nimaua Paulo wayahina, ka avona, “Anau-kaiwemi Kauvea nihenina.”

²³ Yauke Paulo Gaiusi nui amamaei tauna ya manua nihenina. Ka tauna kadu tau ekalesia papani taina nihenina awaehei inau-hohona itapanono ya manua taina nihenina. Ka Gaiusi kadu nau-kaiwemi.

Erasitusi kina habuhabuna a tau dune-vi-avina meagai taina wayahina.^a Ka tauna nau-kaiwemi.

Ka kadu aitam vavaneika ana wava Kuaritusi nau-kaiwemi.✠ ²⁴ a

Paulo Yaubada Awa-davei Ya Viama Wayahina

²⁵ Yauke Iesu Tau Ito-yavuha Vaneana Ahiahina anaunau-waheyei, ka vaneana kadu awaehei Yaubada ana pata na-ivaitemi umamaei toyoina Iesu nihenina. Tuta nonova Yaubada ya tau apa-taputapu dewana wayahina iginuginumi. Ka tuta nonova a itoava tuta ataina wayahina eha aitam koiaka iginuma-naia ai anamana t'-anamane-vidoha, ka eha aitam koiaka iginuma-naia ta-nua-hau. Iuna Yaubada dewana hivehivei.✠ ²⁶ Kate tuta ataina Yaubada avaha

✠ **16:21:** Dew 16:1-2; 19:22; 20:4. **a 16:23:** Tomotau sinasi-
napui ivona Paulo leta taina ginumi meagai Korinita nihenina.

✠ **16:23:** Dew 19:22; 1Ko 1:14. **a 16:24:** Vo-vina tupwai
nihenia mataina 24 mamaei. Kate Iginuma me Girisi movia
tutuaina nihenia eha ta-mamae. Wayahina, tomotau sinasinapui
ivona matainana eha Paulo ya iginuma, kate munia mani tomotau
itotohi iginuma nihenina. Wayahina, tuta ataina wayahina
vo-vina habuhabui yai dewa mataina 24 ini-tawanei. ✠ **16:25:**
Epe 1:9; 3:5, 9; Kol 1:26; Rom 1:5.

veimeyeai dewana avo-vi-mahetemi tauna ya tau apa-taputapu-naia yai iginuma wayahina. Iuna Yaubada ya nuanua ananina tau ma' papani habuhabui nihenia Vaneana Ahiahina inononi, ivitumahanei, e tauna ivi-ateteyei deina. ²⁷ Nua-uya habuhabuna mamaei Yaubada a heta-ohota wayahina. Ka yau nuanua habuhabuka Iesu Tau Ito-yavuha nihenina Yaubada didigana kavovinatei tuta tuta eha a itovewana wayahina!
Ana pata deina.
Yauke Paulo

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 11 Nov 2022 from source files dated 9 Oct 2020

b67aeef-7e9d-566a-9ff5-cb22ab7e2ea4